

道光肇慶府志

肇慶府志卷十六

宦績一

漢南漢

吳

晉

宋

梁

陳

隋

唐

陸賈

羅宏

何倣

喻猛

陳臨

綦母俊

周倣

步隲

陳稚升

以上漢

陸允

吳

王毅

張鎮

楊方

袁宏

以上晉

劉勔

陳伯紹

宋

杜僧明

蕭勵

以上梁

錢道戢

區伯虎

馮僕

以上陳

韋洸

馮益

以上隋

馮智戴

畢都護

房千里

陳讜

劉知謙

竇漢

以上唐

蘇章

梁克貞李守鄺南漢

馮拯

陳堯叟

張錫

楊伾

包拯

潘夙

鄭敦義

薛利和

趙師旦

曹觀

孔延之

田開

鄭夷甫

陳升之

陳亞

周敦頤

祖無澤

王靖

梁立則

彭清

侯晉升

李南仲

蕭韓

孔元勳

郭祥正

張夔

吳達

鄧孝廉

黃勳

劉藻

張宋卿

黃適

嚴武

廖玖

李彌遠

蘇洸

王治

黃琮

鄧弼亮

章元振

許騫

黃公度

黃濟

陳景肅

傅雱

盧順之

連南夫

黃朴

留正

留碩

黃執矩

陳豐

劉衍

張格

王沂之

李朴

林扞

劉燾

李維

徐應龍

王亘

單傳

黃葵

馬晞驥

王克恭

上官謚

滕安

唐彪

陳岳

李茂先

冷應澂

郭聞

吳與

李春叟

吳文震

趙必瑑

阮通志作必瑑

宋上

呂恕

張汝弼

蘇輝

高芝

札忽進義

倉振

高若鳳

張允明

韓元善

薛里吉思

拜住

白景亮

謝必昌

王良

楊廷璧

迭里迷失

羅蒙正

張度

史格

陳文仲

以上元

漢

陸賈楚人也以客從高帝定天下有口辯常使諸侯時中國初定尉佗平南越因王之高帝使賈賜佗印為越王佗未即前賈築城治館於城西水滸以待之及賈至佗魑結箕踞不

爲禮賈因說佗佗乃起謝卒拜佗爲南越王令稱臣奉漢約
歸報高帝大悅拜賈爲大中大夫高后時禁南越關市鐵器
於是佗乃自尊號爲南越武帝侵長沙文帝召賈復使南越
道過端溪錦石山默禱山靈能下佗者當以錦裹石爲山靈
報賈至而越王甚恐爲書謝去帝制黃屋左纛世傳賈兩奉
使所著有南越紀行蓋紀其遊覽所及也及還募人遍植花
卉以代錦因名錦石山舊山下有陸大夫祠康人至今歲時
祭之

德慶
州志

論曰或問陸大中使臣也曷爲列宦績蓋有功於斯
是遊宦遺績也當佗王南越時賈說不行佗不下漢
人耀兵窮征越人其荼毒矣唐太宗謂魏徵一言勝
兵十萬大中亦然矧端康皆其轍迹所至哉

辛酉
志

羅宏長沙人元封五年初置交州部刺史察所部郡國治所
在蒼梧郡往刺史多以荒遠行部罕遍部吏因得恣其貪殘
宏爲刺史春行冬息徧歷所部咨詢疾苦太守多解綬請罪
宏廉實舉發一時貪殘爲之斂迹

汪森原
西文載

何敞九江人元始中爲交趾刺史行部至高要縣宿鵠奔亭
夜未半有女子從樓下出自云妾姓蘇名娥字始珠廣信修
泰里人夫久亡有雜繒百二十疋婢名致富不能自振欲往
旁縣賣繒就同縣人王伯賃牛車一乘攜錢萬二千以前年
四月十日到此亭時已暮不敢前因留止致富暴得腹痛妾
往亭長舍乞漿取火亭長龔壽操刀持戟來至車旁問妾曰
夫人從何所來車上何載丈夫安在何故獨行妾應曰何勞
問之壽因捉娥臂欲汚娥不從鼓刀偪之又不從立刺死之

隨捉殺致富並瘞於亭樓下取財物去屠牛焚車牛骨投亭東井中痛酷無所恕故來控使君倣曰今欲發汝屍體以何爲驗答曰妾上下皆着白衣素絲履猶未朽也掘之果然倣乃遣吏補壽拷問具服下廣信縣驗問與娥語同收壽表卽斬之

舊志

按後漢書何倣爲汝南太守無交趾刺史事王謨增輯謝承後漢書以蘇娥事屬周倣殆以爲傳聞偶異及考北堂書鈔引謝書實有交趾刺史周倣之文是周倣爲交趾刺史審矣但疑事無質蘇娥事今兩存之

喻猛字驕孫豫章人和帝時爲蒼梧太守以清白爲治郡人

歌之

江西通志

陳臨字子然南海人

黃通志

爲蒼梧太守人遺腹子報父怨捕

得繫獄傷其無子令其妻入獄遂產得男人歌曰蒼梧陳君

恩廣大令死罪囚有後代德參古賢天報施臨爲蒼梧太守

推誠而理導人以孝弟臨徵去後本郡以五月五日祠臨東

城門上令小童潔服舞之

王謨增輯謝承後漢書

綦母俊者會稽上虞人也少涉儒學治左氏春秋永初中舉

孝廉拜左校令出爲交阯刺史元初三年合浦蠻夷反叛遣

侍御史任連督州郡兵討之俊保障蒼梧乃往戍行所向摧

靡功當封賞上書歸功命使自謂致寇當誅安帝下詔美之

其後同郡虞翻稱俊拔濟一郡讓爵土之封謂此也

黃通志

周敞汝南人舉孝廉順帝永和元年爲交阯太守求立爲州

朝議不許卽拜敞爲交阯刺史

晉書地理志

懷柔民夷甚有威惠

自鄧讓以七郡歸附後寇賊時發做能勞來安集海寇不敢

犯境辟同郡陳茂為別駕從事並有奇績黃通志蒼梧廣信封

地川女子蘇娥行宿高要鵲巢亭為亭長龔壽所殺及婢致富

取其財物埋致樓下交趾刺史周敞行部宿高要亭覺壽姦

罪奏之殺壽王談增輯謝承後漢書

步騭字子山臨淮淮陰人也建安十五年出領都陽太守徙

交州刺史立武中郎將領武射吏千人便道南行明年拜使

持節征南中郎將劉表所置蒼梧太守吳巨陰懷異心外附

內違騭降意懷誘請與相見因斬狗之威聲大震士燮兄弟

相率供命南土之賓自此始也益州大姓雍闓等殺蜀所署

太守正昂與燮相聞求欲內附騭因承制遣使宣恩撫納由

是加拜平戎將軍廣信侯吳書本傳

陳稚升蒼梧太守治尚清靜民化之囹圄恒空臨水釣魚以

自適

廣西通志

吳

陸允字敬宗凱弟也始爲御史尙書選曹郎後爲衡陽督軍都尉赤烏十一年交趾九真夷賊攻滅城邑交部搔動以允爲交州刺史安南校尉允入南界喻以恩信務崇招納高涼渠帥黃吳等支黨三千餘家皆出降引軍而南重宣至誠遺以財幣賊帥百餘人民五萬餘家幽深不羈莫不稽顙交域清泰就加安南將軍復討蒼梧建陵賊破之前後出兵八千餘人以充軍用永安元年徵爲西陵督封都亭侯後轉左虎林中書丞華覈表薦允曰允天姿聰明才通行潔昔歷選曹遺跡可紀還在交州奉宣朝恩流民歸附海隅肅清蒼梧南

海歲有舊風障氣之害風則折木飛沙轉石氣則霧鬱飛鳥
不經自允至州風氣絕息商旅平行民無疾疫田稼豐稔州
治臨海海流秋鹹允又蓄水民得甘食惠風橫被化感人神
遂憑天威招合遺散至被詔書當出民感其恩以忘戀土負
老攜幼甘心景從衆無攜貳不煩兵衛自諸將合衆皆脇之
以威未有如允結以恩信者也銜命在州十有餘年賓帶殊
俗寶玩所生而內無粉黛附珠之妾家無文甲犀象之珍方
之今臣實難多得宜在輦轂股肱王室以贊唐虞康哉之頌
江邊任輕不盡其才虎林選督堪之者衆若召還都寵以上
司則天工畢修庶績咸熙矣允卒子式嗣

吳書陸
凱傳

晉

王毅長沙人少以學行被州郡辟仕至蒼梧太守

黃通志

後爲

廣州刺史甚得南越之情

晉書王機傳

以家國爲憂永興二年卒

于廣州

黃通志

張鎮字義遠吳國吳人忠恕廉明簡正貞粹泰安中除蒼梧太守討王含有功封興道縣侯

劉義慶世說新語注

楊方字公回少好學有異才初爲郡鈴下威儀公事之暇輒讀五經鄉邑未之知內史諸葛恢見而奇之待以門人之禮由是始得周旋貴人間時虞喜兄弟以儒學立名雅愛方爲之延譽恢嘗遣方爲文薦郡功曹主簿虞預稱美之送以示賀循循遂稱方于京師司徒王導辟爲掾轉東安太守遷司徒叅軍方在都邑搢紳之士咸厚遇之自以地寒不願久留京華求補遠郡欲閑居著述導從之上補高涼太守在郡積年著五經鈎沉更撰吳越春秋並雜文筆皆行於世以年

老棄郡歸導將進之臺閣固辭還鄉里終於家

晉書本傳

袁宏字彥伯侍中猷之孫也父勗臨汝令宏有逸才文章絕

美謝尚鎮牛渚引宏參其軍事累遷大司馬桓溫府記室性

彊正亮直雖被溫禮遇至於辯論每不阿屈故榮任不至

晉書

文苑傳

哀帝時爲南海太守表章行誼大興風教漢徵士番禺

董正學行著在南土宏奏旌其門

黃通志

宋

劉劭字伯猷彭城人少有志節好文義家貧爲廣州增城令

吏幹精通民獠讐服刺史劉道錫引爲揚烈府主簿道錫遣

劭詣京師太祖見之酬對稱旨除寧遠將軍綏建太守元嘉

末蕭簡據廣州劭起義討之燒其南門刺史宗慤又命爲軍

府主簿以功封大亭侯除員外散騎侍郎大明初遣費沈伐

陳檀不克乃除勔龍驤將軍西江督護鬱林太守太宗卽位假輔國將軍除廣州刺史方討殷炎於豫州不克拜勔著聲南土廣人思之元徽中桂林王休範作亂勔與戰死之事平

贈司空

吳志參宋書

陳伯紹潁川人廣西南有二江源深遠別置督護專征討以

伯紹爲西江督護

鄭樵通志

泰始四年三月交州人李長仁據州

叛妖賊攻廣州殺刺史羊南伯紹時爲龍驤將軍討平之

宋書

明帝紀

梁

杜僧明字宏照廣陵臨澤人形貌眇小而膽氣過人有勇力善騎射梁大同中盧安興爲廣州刺史南江督護僧明與兄天合及周文育並爲安興所善請與俱行頻征徕獠有功爲

新州防助天合亦有才安興死僧明復副其子子雄及交州
土豪李賁反逐刺史蕭諮諮奔廣州臺遣子雄與交州刺史
孫問討賁時春草已生瘴癘方起子雄請待秋討之廣州刺
史蕭映不聽蕭諮又促之子雄等不得已遂行至合浦死者
十六七衆潰散禁之不可乃引餘兵還蕭諮啟子雄及問與
賊交通逗遛不進梁武帝敕於廣州賜死子雄弟子畧子烈
並豪俠家屬在江南天合謀於衆曰盧公待遇我等甚厚今
枉死而不能報非丈夫也我弟僧明萬人之敵若罔州城召
百姓誰敢不從城破斬二侯然後待臺使至束手詣廷尉死
猶勝生縱不捷亦無恨矣衆慷慨曰唯足下命之乃與周文
育等率衆盟奉子雄弟子畧爲主以攻蕭映子畧軍城南天
合軍城北僧明文育分據東西吏人並應之一日之中衆至

數萬高祖時在高要聞事起率衆來討大破之殺天合擒僧
明文育等並釋之引爲主帥高祖征交趾及討元景仲僧明
文育並有功侯景之亂俱隨高祖入援建業高祖於始興破
蘭裕僧明爲前鋒斬裕梁元帝承制授新州刺史臨江縣子
荊州陷隨侯瑒西援於江州病卒贈散騎常侍諡曰威世祖
卽位追贈開府儀同三司

陳書本傳

蕭勵字文約弱不好弄喜愠不形於色位太子洗馬除淮南
太守以善政稱遷宣城內史郡多猛獸常爲人患及勵在任
獸暴爲息又遷豫章內史道不拾遺男女異路徙廣州刺史
去郡之日吏人悲泣數百里中舟乘填塞各齎糧食以送勵
勵人爲納受隨以錢帛與之至新淦縣所山村有一老姥以
盤擎鱸魚白送舟側奉之童兒數十人入水扳舟或歌或泣

廣州邊海舊繞外國舶至多爲刺史所侵每年舶至不過三數及勵至纖毫不犯歲十餘至俚人不賓多爲海暴勵征討所獲生口寶物軍賞之外悉送還臺前後刺史皆營私蓄方物之貢少登天府自勵在州歲中數獻軍國所需相繼不絕武帝歎曰朝廷便是更有廣州有詔以本號還朝而西江俚帥陳文徹出寇高要詔勵重申蕃任未幾文徹降附勵以南江危險宜立重鎮乃表臺於高涼郡立州敕仍以爲高州以西江督護孫固爲刺史徵爲太子左衛率卒諡光南史吳平侯景傳錢道戢字子韜吳興長城人少以孝行著聞及長頗有幹畧高祖微時以從妹妻焉從平盧子畧於廣州除賓江令高祖輔政遣道戢隨世祖平張彪於會稽以功拜直閣尋爲臨海太守以平留異功拜持節通直散騎常侍輕車將軍衡州刺

史領始興內史又以平歐陽紇功除左衛將軍

陳書本傳

陳

區伯虎南海人祖金父頴皆刺史伯虎智勇有軍功益折節讀書官至新州刺史撫綏民僚政得人和陳寶應連留異爲亂伯虎從都督章昭達討之功業赫然

吳志

馮僕高州良德人陳永定二年僕年九歲以母洗氏功拜陽春太守後洗氏復誅歐陽紇僕加封信都侯

陽春志

隋

韋洗字世穆性剛毅有器幹少便弓馬仕周累遷開府隋文帝爲丞相從季父孝寬擊尉遲迴於相州以功拜柱國進襄陽郡公伐陳之役爲行軍總管及陳平拜江州總管畧定九江遂進圖嶺南上與書慰勉之洗至廣州嶺表皆降之上聞

而大悅許以便宜從事洸所綏集二十四州拜廣州總管歲餘番禺夷王仲宣反以兵圍洸洸拒之中流矢卒贈上柱國賜綿絹萬段諡曰敬子協字欽仁好學有雅量位秘書郎其父在廣州有功上命協齎詔書勞問未至而父卒上以其父

死王事拜協柱國

北史本傳

馮盎字明達僕之子也隋仁壽間以平寇功累封金紫光祿大夫拜漢陽太守從煬帝伐遼東遷左武衛大將軍隋亡奔還嶺表署酋領有衆五萬番禺新興名賊高法澄洸寶徹等戕殺官吏盎率兵破之寶徹兄子智臣復聚兵拒戰盎進討兵始合輒釋胃大呼曰若等識我耶賊衆委戈袒而拜徒衆遂潰擒寶徹智臣等遂有番禺蒼梧珠崖地自號總管或請上南越王號盎曰吾居越五世人生富貴如我希矣常恐忝

先業敢自王哉唐武德五年始以地降高祖析爲高羅春白崖儋林振八州授盎上柱國封越國公子智戴最知名

陽春志

唐

馮智戴以父盎功拜春州刺史勇而有謀能撫衆得士死力尚帥皆樂屬之貞觀初或告盎叛盎因遣智戴入侍後復入朝帝榮賜加等授衛尉少卿帝聞其善兵指雲問曰下有賊今可擊乎對曰雲狀如樹方辰在金金利木柔擊之勝帝奇其對累遷左武衛將軍卒贈洪州都督

陽春志

畢都護不知其名東平人起諸生爲廣東瀘陽令尋轉韶州司馬秩滿丁內憂性孝幾於毀滅御史大夫蕭瑒嘉之拔補按察判官授新州刺史按察使宋璟使戍恩州以能補刺史尋加朝散大夫遷端州刺史

粵西文載

按李監石室記有那伯早公後人誤以爲畢公

見金石門旱公事蹟不可考張九齡畢公墓誌銘公諱某
字某東平人四世祖義雲北齊度支郎中青州刺史曾祖
炎貞觀初并州白馬府右果毅都尉右衛郎將祖父蒲州
河東令坐事左轉桂州歸義縣丞因家於始寧父誠舉孝
廉高尚不仕公即孝廉府君之子稟靈純茂姿性開朗亦
既志學休有令聞雖在諸生之中已有萬人之望矣夫忠
有世善有元仁於其親友于兄弟豈尚行所致其因心而
然公之植身根萌素厚操本制末何適非宜故為政之方
所從來遠矣某年初有御史將令黜陟幽明公時盤桓居
貞未有攸往而使者承式固才求褐衣見召直繩斯委
乃表公授梧州錄事參軍非其好也先是剽劫在境行李
所病綱佐無幾連盜肅然歲滿授廣州府陽台事必簡舉
人用安便莫不咨嗟未始見也尋轉韶州司馬其政如初
秩滿丁內憂公有至性幾於毀滅廬墓展哀泣血扶病有
加一等不惟三年嶺南按察使廣州都督兼御史大夫蕭
瑋孝悌之士也以錫類之故有加德音於是拔補按察判
官義行相成終始如一尤加欽重特以表聞敕授新州刺
史屬恩州曹帥以公為五府總管以甲卒戍焉雖臨之兵
廣平郡公宋璟以公為五府總管以甲卒戍焉雖臨之兵
威而開以恩信俾念驚狼戾化梟為人廣平公深以為能
奏假恩州刺史俄又真授夷落大寧尋加朝散大夫遷端
州刺史居必致理莫非嘉績屏藩之寄朝選以歸于是加
秩中散大夫拜安南副都護到官未幾間忽遷殂時年六
十某年月日庚子歸葬于某山之原公內行無玷外物不

于文非務學皆為己所蒞數郡遺愛在人全己面歸可
謂厚矣有子曰某街恤終天愬哀遠日永惟稱代存乎幽
篆銘曰倚歟畢侯濬源長流受氏於畢爰自有周彼美世
載實惟孫謀賢哲繼軌斯其遠猷嗟彼懿宗是生孝友知
實內積行非外誘家邦必聞人倫歸厚微此合德夫豈善
宇亦既從政厥聞載榮邑能訟息郡用禮成蠻夷慕教聽
梟變聲九真副領萬里揚旌護彼絕域義忘險艱緹律未
改丹旄而還存沒之際忠孝之間徽音無泯篆德茲山

房千里河南人太和進士有才學善詩文為端州別駕留心

政治大得民情遷高州刺史

舊通志

陳讜字昌言福州侯官人登三吏科後為本郡長史以便養

親累遷春韶二州刺史皆有善政卒讜仁孝謙恭居官餘祿

悉與交親共之鄉邦稱美

福建通志

劉知謙壽州上蔡人避亂客封州為清海牙將節度使章寅

以兄女妻之眾謂不可宙曰若人狀貌非常吾以子孫託之

黃巢自嶺表北還湖湘間羣盜蟻結知謙因據封川有詔即

授刺史兼賀水鎮使以遏梧桂知謙撫納流亡愛嗇用度養士卒未幾得精兵萬人多具戰艦境內肅然久之疾病召諸子曰今五嶺盜賊方與吾有精甲犀械爾勉建功時哉不可失也知謙卒兵推其子隱爲嗣清海軍節度使劉崇龜表爲封州刺史嗣薛王智柔代領節度未至而牙將盧琚叛隱率兵奉迎智柔直趨廣州擒琚獻之於是智柔以聞昭宗拜隱本軍行軍司馬俄遷副使天復初節度徐彥若死隱自稱留後虔人盧光稠者有衆數萬據州自爲留後又取韶州隱與爭之戰不勝悉師攻虔州光稠伏軍掉戰隱縱驅伏發挺身免天祐初始詔隱權節度留後乃遣使者入朝重賂朱全忠以自固是歲光稠死子延昌自稱刺史爲其下所殺更推李圖總州事圖死鍾傳盡刳其衆欲遣子匡時守之不克州人

自立譚全播爲刺史附全忠

云舊唐書本傳

賈漢者扶風人父思亮榆林太守卒官家事日落漢攻明經業不第意恬如也後以名家子被舉爲毫令有能聲召爲鴻臚丞改殿中丞中宗欲立安樂公主爲皇太女以問禮官漢奏曰京房易云陰當陽大不祥昔天后御龍於南面今公主駕鶴於東宮皆大亂之道也帝惡其忤直出爲忠州長史流寓成都久之聞太子重俊被僇嘆泣監司復以怨黜尋起爲端州長史厲志臨政日昃忘食聽煩制劇民甚宜之竟以勞悴卒官

黃通志

唐李商隱爲李郎中祭舅寶端州文始虞命夏暴于元穹功隨刊木德叶堙洪帝相之難作誕少康於寶中由屯獲吉因生受封降及後代傳助繼庸西京則嬰爲外戚東漢則融居上公愍陽城之不享如移籍於扶風源遠更清基高自峻有焯明靈藹然休聞陋巷不憂坦途方進月遠標儀霞高映論玉方經體雖要處囊宜伸尙屈將集猶翔

私淑大易謙尊以光誓安老氏績少易償爰紆銅墨是幸
豫梁宏琴時奏帝閣逾芳人贊朝儀言揚從事舉圭璧蠻夷
弁冕文武吐辭含韻知今博古進揖退揚從規合筆復陶
啓位殿省承榮孔門之束帶無忝漢官之綈葛難更君子
信謙小人道長未暇閉關梁改秩錦里經時人去而琴堂
誰識卑飛因成利往銅梁改秩錦里經時人去而琴堂
棟文移而石室摧基劉宏之重銘葛廟王商之更立嚴祠
隴首云歸端溪遠運角豈觸藩臂終川木海濶天高山深
霧毒許靖他鄉有名無祿馬超正色宜歌反哭何爲善之
無憑而降災之甚速某飲惟敬義鳳所依因在昔家世勤
王實殷高旌大飾結駟飛輪慶豈遺于自出榮實垂於外
烟一紀已束艱因適及嗟宅相以無取罷堂構之不集詎
言渭水之垂離竟絕西川之出入嗚呼哀哉違京背闕古
陌荒阡松門積藹離首作州祀庭是日乞墅何年淚有血
面皆墮憤無磨而可填況玕剖郡符環持使節塞遠城迴
河窮路絕顧後瞻前形孤影孑長號出次重拜臨穴酒醴
清濃微羞羅列庶有鑒於斯文冀不同于虛設

南漢

蘇章以牙校事南漢高祖積功至左右衛使大夫初楚人舉
水軍侵封州章將神弩三千戰艦百艘往救既至賀江章沉

鐵絙於水中爲巨輪兩岸上築隄以隱之因輕舟迎戰陽敗而奔楚人以爲怯也逐之章舉巨輪挽絙鎖楚舟楚舟不得進退用強弩夾江射之楚人大敗解圍遁去高祖改章封州團練使封川志章驍勇善戰而行軍多合古法遂爲一時名將子五人俱爲中郎將豪俠任氣當世號五郎將云梁克貞與章同時勇畧頗亞於章十國春秋大有三年交州亂高祖命克貞討之俘其節度使曲承美五代史世家已又入占城取寶貨而回由是南蠻大恐讐服兵威實克貞力也時共事者爲李守鄜功亦與克貞埒十國春秋

宋

馮拯字道濟河陽人少以書生謁趙普普奇其狀曰子富貴壽考不下我舉進士補大理評事淳化中有上封事言立皇

太子者拯與尹黃裳王世則洪湛伏閣請立許王元儋太宗
怒悉貶嶺外拯知端州既上言請遣使括諸路隱丁更制版
籍及議鹽法通商十餘事太宗欲召還叅知政事寇準素不
悅拯乃徙知鼎州改通判廣州郊祀遇覃恩遷尙書員外郎
真宗時以吏部尙書檢校太傅同平章事乾興初進封魏國
公卒贈太師中書令諡文懿

嘉靖志

陳堯叟字唐夫閬中人端拱三年登甲科解褐光祿寺丞直
史館與父省華同日賜緋遷秘書丞至道中知端州至郡首
疏地無他植惟產苧蔴請折數織布以償芻直民便之進樞
密直學士知三班兼銀臺通進封駁司置郡牧使

同上

張錫字貺之其先京兆人曾祖山甫嘗從唐僖宗入蜀蜀平
徙家漢陽賜進士甲科試秘書省校書郎知南昌縣遷著作

郎知新州初建學於州自是人始知學再遷太常博士樞密直學士李及薦爲監察御史丁謂貶崖州議還內地錫䟽謂奸邪弄國本與天下共棄之今還違天下意繇是止徙雷州進翰林侍讀學士判太常寺國子監卒贈尙書工部侍郎錫瀋重清約雖貴奉養如賤時喜讀書老而彌篤初舉廣文館進士考官任隨以爲第一及隨死無子錫屢賜其家

明統志

楊伍字大中登大中祥符八年進士授國子博士進尙書屯

田員外郎知康州有治績以廉謹名天下仁宗嘗稱之

廬陵志

包拯字希仁廬州合肥人天聖五年進士除大理評事調知天長縣有盜割人牛舌者主來訴拯曰第歸殺而鬻之尋復有來告私殺牛者拯曰何爲割牛舌而又告之盜驚服徙知端州遷殿中丞端土産硯前守緣貢悉取數十倍以遺權貴

拯命制者才足貢數歲滿不持一硯歸尋拜監察御史

宋史疏

請選廣南知州尋又奏請廣南添差職官章再上從之官至

樞密副使今載祀典

嘉靖志

潘夙字伯恭大名人武惠公美之孫天聖中上書論時政見

用後知韶州擢江西轉運判官坐事謫監隨州酒稅起知光

化軍大臣以將帥才舉之易端州刺史召對訪交廣事稱旨

遷司封郎中

宋史

鄭敦義仁宗時知端州務農重學常築石城民永懷之

明統志

薛利和河東人皇祐中知春州秉心耿介勤於修職勸農興

學甚得為政之體

陽春志

趙師旦字潛叔單州武城人後徙居山陽樞密副使稹之從

子美容儀身長六尺少年頗涉書史尤刻意刑名之學用稹

磨試將作監主簿累遷寧海軍節度推官知江山縣斷治出
已吏不能得民一錢改大理寺丞知彭城縣遷太子右贊善
大夫移知康州智高破邕州順流東下師旦使人覘賊還報
曰諸州守皆弃城走矣師旦叱曰汝亦欲吾走乎乃大索得
謀者三人斬以徇而賊已薄城下師旦止有兵三百開門迎
戰殺數十人會暮賊稍却師旦語其妻取印佩之負子以匿
曰明日賊必大至吾知不敵然亦不可去爾曹死無益也遂
與監押馬貴部士卒固守召貴食貴不能食師旦獨飽如平
時至夜貴卧不安席師旦卽卧內大鼙遲明賊攻城愈急左
右請少避師旦曰戰死與戮死何如衆皆曰願爲國家死至
城破無一人逃者矢盡與貴俱還據堂而坐智高麾兵鼓譟
爭入脅師旦師旦大罵曰餓獠朝廷負若何事乃敢反耶天

子發一枝兵汝無遺類矣智高怒害之監押馬貴亦力戰而死賊既去州人爲立廟以貴配享贈光祿少卿賜其母王長安縣太君冠帔錄其子弟并從子三人師旦遇害時年四十二柩過江山江山之人迎喪哭祭於路絡繹數百里不絕先是師旦藏其妻於山谷生一子棄草中賊去後三日尙生人謂忠義之報崇寧五年賜廟額曰忠景靖康初追諡愍惠侯

明統志

曹觀字仲賓建安人父修禮不仕叔修古知興化軍卒無子天章閣待制杜杞爲言於朝授觀建州司戶叅軍爲修古後皇祐中以太子中舍知封州儂智高叛攻陷邕管趨廣州行至封州人未嘗知兵士卒纔百人不任戰鬪又無城隍以守或勸觀遁去觀正色叱之曰吾守臣也有死而已敢言避賊

者斬麾都監陳曄引兵迎擊封川令率鄉丁弓手繼進賊衆數百倍曄兵敗走鄉丁亦潰觀決戰不勝被執賊戒勿殺掙使拜且誘之曰從我得美官付汝兵柄以女妻汝觀不肯拜且罵曰人臣惟北面拜天子豈從爾苟生耶速殺我幸矣賊猶不忍徙置舟中觀不食者兩日探懷中印授其從卒曰我且死若求間道以歸上官賊知其無降意殺之至死詬賊聲不絕投屍江中時年三十五事聞贈太常少卿錄其子四人妻劉避賊死於林崗追封彭城郡君加賜冠帔又贈修古工部侍郎封修古妻陳潁川郡君當智高之反乘嶺南無備州縣吏往往望風竄匿故賊所向輒下獨觀與孔宗旦趙師旦能以死守後田瑜安撫廣南爲觀立廟封州

吳志參宋史明統志云妻聞

觀死自經其妹亦赴井死事聞諡忠肅

孔延之字長源臨江新淦人幼孤自感厲晝耕讀書壟上夜
燃松明繼之學藝大成鄉舉進士第一遂中甲科授欽州軍
事後知封州寬恤民力所更置五十五事弛役二千人使者
欲城封州延之爭以爲無益乃止遷廣南西路轉運判官以
母老辭不許改荆湖北路提點刑獄自欽州九遷至尙書司
封郎中賜服緋魚有三子文仲武仲平仲同讀書於郡齋俱
好學成名後人榜其齋曰桂堂

明統志

田開嘉祐三年知封州愛民重士興學勸農吟咏甚富及去

任民懷其惠

明統志

鄭夷甫嘉祐中封州判官有惠政豫知死日至期沐浴更衣

面溪亭親督灑掃揮手指畫間屹然立化僵如植木

明統志

陳升之字暘叔建州建陽人初名旭避神宗嫌名改焉舉進

士歷知封州有能理才遠邇稱其賢監司薦之入爲監察御史知諫院彭思永論事令窮問所從來唐介劾宰相斥嶺南升之皆極諫官至中書門下平章事集賢殿大學士封秀國公

舊通志

陳亞與升之同族真宗時知南恩州以地多烟瘴夷獠雜處務行寬政深得民心其宦績視升之尤優云

明統志

周敦頤字茂叔道州營道人熙寧初用趙抃呂公著薦爲廣東轉運判官提點刑獄以洗冤澤物爲已任不憚勞苦雖瘴厲險遠亦綏視徐按端守杜懿取硯無廢人號爲杜萬石敦頤惡其奪民利因請著令凡仕於端州者買硯不過一二枚凡巖洞之勝若端之石室康之三州春之銅石皆常游覽紀姓名歲月於石今各邑多有濂溪書院伊洛淵源錄

嘉靖志

祖無擇字擇之上蔡人進士高第厯知南康州提點廣東刑
獄廣南轉運使長於言語政事爲時名臣守康時政暇每遊
山水嘗作三洲巖銘官至秘書監集賢院學士上同

按宋史無擇傳云厯知南康軍提點淮南廣東刑獄

廣南轉運使入直集賢院所云南康軍乃江西軍州

此傳誤以德慶州當之考新唐書武德六年德慶始

名南康州作唐書四年自貞觀十年更名康州至宋紹興

元年升德慶府更無南康之稱觀無擇三洲巖題名

在皇祐二年二月而不列銜同是年閏十一月羅浮

長壽淵題名則書提點諸州刑獄太常博士皇祐四

年連州大雲洞題名則書廣南東路水陸計度轉運

使太常博士直集賢院並無一字及康州其三洲巖

銘有云我官雖鄙一歲三至此亦不過按部來遊不可據爲守康之證新舊通志沿嘉靖舊志之誤皆云知康州舊傳不便輒刪改爲加辨正如此

王靖字詹叔大名人以司勳郎中爲轉運使巡行十六州雖瘴厲如春新亦皆歲一再至

廣州志

梁立則熙寧中知新州興修水利於州西南十里得白繕坑決其水溉田至今爲利

明統志

彭涪字道源廬陵人登熙寧六年進士第歷守康賀二州所至有惠政嘗上書譏切王氏之學崇寧三年編入黨籍政和初以朝奉大夫致仕有徹溪居士集五十卷周必大楊萬里爲之序

廬陵志

侯晉升字德昭曲江人元豐進士爲蘇軾兄弟所重崇寧中

知南恩州賑恤窮寡禮待英賢期年而卒

韶州志

李南仲英州浚陽人十歲舉神童遂中童子科元豐後賜出身者五人南仲其一也授從事郎歸省親自以學未大成遜

於羅浮之麓誦讀不輟大觀初知康州以治行聞

英州舊志

蕭韓字唐仲龍溪人大觀三年進士知南恩州遇疾藜賊曰聞公德政願與更生韓招徠之郡無城郭苦海寇爲害乃築城植刺竹以衛之創建學舍市田置書免秀民徭役教養不

倦

福建通志

孔元勳番禺人紹興初鄉薦中進士乙科四任學官三歷倅車乃知封州嘗上機切預防七事多見施行值廣寇薄城鄉人大恐元勳率僚屬嬰城自守每事以身先之人爲盡力又募善射士連斃二酋餘黨奔潰朝廷以異恩褒賞之轉朝散

大夫知新州撫字有聲未及大用而卒其父粹熙寧間知封

州亦以善政聞

廣州舊志

郭祥正字功父當塗人

宋史

舉進士熙寧中爲僉書保信軍節

度判官乞用王安石安石反詆之遂以殿中丞致仕後復出

知端州留心政術以靖蠻方民樂其化尋棄官隱於青山

明統

志

張夔字致堯潮州人登政和八年進士宰茂名諸司薦南中
清介一人高宗特賜璽書獎諭擢判廉州廉產沉香生金夔
一毫無取又能化諭羣盜令投戈自散紹興二年遷知新州
時學校自舍法罷士習委靡夔重修郡庠厚加餼廩暇日至
學與生徒執經問難他郡學者聞風而至又梓五經以頒民
間子弟築陂瀦水灌田千餘頃民稱張侯陂前後皆以清節

著高宗嘗書其名於屏曰南有張夔北有周所夔五十登第

七十致仕年九十三所著有祿隱集

潮州志

吳達字公路崇安人宣和三年進士初知新州擢知肇慶府

置學田籍以杜豪民吞併

福建通志

鄧孝廉字清臣曲江人登建炎三年進士以朝散郎倅邑改知德慶府往時歲租倍取民不堪命孝廉定輸數以示民民

樂歌之

韶州志

黃勲字有功南海人紹興二年進士始授永福丞尋進右朝奉郎知新昌縣有富民子訟析貲不平召其族長諭使直之而訟以息人以爲得大體郭外五里許昏夜有殺人者遺所刺刀驗之皆豕膏也值旱徧禱於境內神祇多使售豕集屠宰牲其中一人刀獨新一斫卽伏人以爲神久之進朝散郎

知雷州改知新州視事首禁火葬違者以弑逆論媮俗爲改
又課民耕犢使上其數於官自是一郡無敢私殺牛者學田
不足缺膳羞乃以俸貲增置之政暇卽與諸生講解士子樂
從而青衿日盛終朝散大夫致仕

廣州人
物志

劉藻字延潔始興人紹興二年進士累官僉書英州判官權
知新州爲人質直好義治尙安靜處無留獄事不付曹革故
去弊百姓愛之嘗新廳事民不告勞胡寅爲之記終朝請大

夫

斐然
集

張宋卿字恭父博羅人也性警敏強記嘗借書於人一閱輒
成誦不忘紹興丁丑以春秋魁南省擢進士第除秘書省正
字遷校書郎正色立朝權貴欲內交者謝絕之由是名重縉
紳胡銓張浚薦其才堪大用出爲肇慶守禮賢興學政務畢

修未幾卒

惠州志

黃適字德夫晉江人以詞賦稱紹興二十七年第進士知廣州東莞縣不苟而辦帥意縣有餘藏會適謁府遣掾襲其職掾奉意指籍常賦爲贏以獻他日府責賦適報掾已輸矣府欲令再斂卽文移數十訖無以償而止帥因薦公治狀籍記中書秩滿守新州

泉州志

嚴武連州人弱冠中甲科累官朝請大夫知南恩州時稱循良論者謂武大父爲獄吏時能辨孝婦冤武之顯庸陰德報也

廣州人
物傳

廖玖字粹老連州人紹興中知新州清公有爲月得廩錢悉付公帑或訝其太過曰吾有一子旣登科吾復何求子顥字季昂九歲能屬文登紹興五年進士第厯戶錄縣令改秩授

封州教授玖新州秩滿歸順迎養焉及玖卒歸葬順哀咷感

動行路世稱其孝

明統志

李彌遜字似之吳縣人

宋史

弱冠以上舍登大觀三年第以徽

猷閣直學士知端州持正不阿監司甚得民情

舊通志

蘇洸字澄老泉州德化人以父任入官知臨川縣修治述陂

民號蘇公陂通判賓州時張栻為帥以廉吏舉除知雷州秩

滿赴闕面陳三劄改知新州民有何暮之歌移封州首請減

放丁米及經制無額之賦至今皆德之

泉州志

王治字元化太原人紹興初知南恩州仁厚勤敏值歲荒發

粟賑饑存活甚眾盜賊竊發練兵以拒之人賴以安暇則詣

學課勵生徒以厚風俗沒後州人立祠祀之

黃琮臨漳人紹興十年以左朝請郎知封州州自廢併以來

學宮毀壞琮下車首問學宮出官羨繕營置學田以養封土

封州學田記

鄧弼亮韶州乳源人元祐進士三世登科有聲南土弼亮爲新興令力行教化而後刑罰劉安世鄒浩謫嶺南弼亮皆與之遊情好甚洽

韶州志

章元振嘉興人紹興中知肇慶府惠政甚多改廣東提舉與秦檜同登第甘於遠宦未嘗以私干檜

明統志

許騫潮陽人申八世孫登紹熙二年進士乙科爲惠州府推官調南恩僉判居官有守遇事不詭隨丁父憂歸卒於家年三十九官終從仕郎

潮州志

黃公度字師憲莆田人紹興八年進士第一人十九年通判肇慶府攝南恩守治事之餘以讀書著文爲樂嘗題隆蔭堂

詩云簿書休吏早花塢向人間增學廩擇秀民與之登降揖
遜學者用勸邦人像而祠之及召還詢以嶺外弊事公度曰
廣東小郡有十年不除守臣者權官苟且郡政廢弛受其弊
高宗曰卿爲吏部當無此弊授考功員外郎終左朝請郎所
著有漢書鐫誤及知稼集等書行世

明統志

黃濟字義卿靜江人紹興二十年自肇慶倅攝新州踰年拜
守時多盜賊始種刺竹圍城一千二百餘丈又新子城樓與
利祛樊先是鄉民之貧死者猶附於籍富厚者多避事役榜
諭之且置大匭於門令民自投戶數於中限滿始發於是戶
口覈寔賦役均平民以不擾胡寅稱其政甚

詳上

陳景肅字和仲漳浦人紹興二十一年進士除知南恩州州
叛服不常景肅持節往諭嶺南遂平

福建通志

傅雱紹興二十一年權知南恩州文章政事迥出衆表民稱

其賢立五馬坊以榮之今坊猶存

陽江志

盧順之海陽人好學篤行登紹興進士調肇慶軍節度推官以母老僅書一考嘆曰一日甘旨之奉猶勝十年仕宦之樂

遂歸終文林郎

舊通志

連南夫湖北德安人高宗時累官廣東轉運使新與饑發粟賑濟全活萬計以平寇功授建州觀察使知循州及金人歸河南地南夫賀表云虞舜之十二州昔皆吾有商於之六百

里當念爾欺秦檜惡其語罷之

潮州志

黃朴字文卿彥臣曾孫以世賞知陽江尉尙書胡銓自海上召還取道陽江聞朴名曰當備爲薦首海寇劉永興犯高雷化三州且掠及南恩朴率客兵船十餘艘出敵賊聞風宵遁

福建通志

留正字仲志泉州永春人紹興進士授南恩州陽江尉先是
邑之丁田米折錢深爲民病正白於芮燧罷之時清海軍節
度判官龔茂良守番禺海寇竊發正語之曰在法刼盜贓滿
五貫死海盜加等小民餌利率身陷重辟請鏤梓海上使戶
知之民始知避嘗捕盜有功當改秩太守以聞正力辭乃止
因茂良薦赴都臺審察宰相虞允文奇之薦於上得對正言
國家右文而畧武備今當改轍使文武並用孝宗嘉賞累官
至丞相封魏國公後其子碩來守郡民請立祠祀正宋史叅明統志
留碩字季鷹一字元美魏公季子嘉定間守南恩處心公平
興利除害上言南州郡兵弱乞刺填軍額以備不虞秩滿改
知岳州民不忍其去遮道攀戀有涕泣者舊通志

黃執矩字才用高要人初尉封川轉新興丞皆有善政早厭
舉子業慕濂洛之學從胡致堂寅張南軒栻遊講明正道叅
訂大學中庸之義以訓後進

封川志

陳豐字直中興化人乾道九年知南恩州政尙廉靜接物以
誠田野無擾民歌曰君不見恩平陳守賢優游治郡如烹鮮
遇旱禱雨自撰書詞云願俾微臣特減數年之壽令茲閭境
普沾三日之霖秩未滿而沒囊無餘貲民哀思之

明統志

劉衍字成之龍溪人治平間及第授英州推官應材識兼茂
科言時務諷及新法報罷後知潮陽改知新州以禦妖賊功

特授朝奉郎

舊通志

張格不傳籍貫知南恩州清白自守仁聞燦然一日遣介還
諸子各啓緘惟蠟酒器十他無一物

王沂之字春伯晉江人以閤廕厯官知新州有惠政去民遮留之後帥瓊管卒於官

李朴字先之興國人登紹聖元年進士第爲四會令有奸民言邑東產金寶抽稅開礦破田疇發墟墓索厚賂乃已朴請罷之

林杆晉江人紹興進士教授肇慶府時所善林孝澤爲廣南東路提舉市舶持節行部館於學一日杆出守貳以下書一東示之皆未啓緘孝澤發守書予以薦牘守持金詣杆謝杆曰釐鹽一第猶恐不稱何使君待我薄也守慚退遷南恩州僉判卒於官

俱同上

劉燭字晦伯建陽人受學於朱熹呂祖謙乾道八年舉進士通判潭州未上丁父憂僞學禁興燭從熹武夷山講道怡然

自適築雲莊山居爲終老之計調贛州坑冶司主管文字知德慶府大修學校奏便民三事又奏罷兩縣無名租錢糾集武勇民兵入奏言前者北伐之役執事不度事勢貽陛下憂今雖從和議願益恐懼修省開言路進人才飭邊備以防敵患帝嘉獎遷工部尙書兼太子右庶子左諭德卒贈光祿大夫諡文簡

宋史
明統志

李維鉅野人寓居泉州淳熙初守南恩弟綸提舉廣東常平酌別江濱兄弟相勵以清白綸臨江矢言曰倘負君民有如此水遂投杯於江杯停不流者久之觀者驚嘆民歌曰石門之水清且清晉吏一飲千古榮爭如李公投杯盟江流洶洶杯停停

泉州志

徐應龍字允叔建寧人淳熙二年第進士知南恩州政清而

嚴好豪屏跡民歌曰生父母在何許養我父母徐州主後累

官至刑部尙書舊通志

王亘字伯通福州人單倬常州人淳熙間相繼知南恩州力

蘇民瘼到今稱之亘墓今在陽春粵大記

按吳志云王亘淳熙中為博羅令修築隨龍蘇村二

堤百姓賴其利後知南恩明統志誤作王旦於是博

羅名宦稱宋丞相前博羅令王文正公矣

黃揆福州人淳熙十四年知新州州之米賤鈔貴例以鈔折

租稅之入民甚苦之揆白諸司乞減其價百姓感悅秩滿入

覲首以鈔租折變之害為言舊通志

馬晞驥新會人淳熙七年進士判肇慶府留心佐政有以奇

硯獻者晞驥謝之曰此非暮夜金但吾職貳郡當飲水自勵

何敢以長物汚家聲其人慙退由是名節益著

廣州人物傳

王克恭字彥禮南安人淳熙十四年進士教授循州以禮義迪後進通判廣州海寇掠境力疾督師擒其酋以徇辟知新州奏減丁米民德之累遷度支駕部郎中

泉州志

上官謐字宇國邵武人爲學務求義理從朱熹學益加涵養以祖蔭授會昌尉調永州軍事推官爲政尙簡易轉知四會視事一如永州未幾卒

黃通志

滕安字景袁平江人大理評事通判廣州慶元間辟知新州未幾括閒田以養士子掄材木以修學舍制爲定規時賢士大夫多稱之

舊通志

唐彪字仲孺靜江人嘉泰三年知新州前此縣道銷丁割稅差役折戶皆取於民田民甚病之彪到任奏罷之邦人感其

德

陳岳字伯咨福州人嘉定戊寅爲恩州守撫循勞來御民以誠民安之其有喪不能葬者爲兩義塚於東山馮將軍墓側別男女以瘞之當道聞其賢薦擢本路提刑

俱同上

李茂先溫陵人紹定六年教授南恩州爲西山真德秀所重

西山以文送之父昉先亦教授南恩皆爲荒服所宗

陽江志

冷應澂字公定洪州分寧人紹定中進士知德慶府前守縱

暴吏侵漁崗獠往往致變應澂檄諭獠感之欲自歸爲謀主

所惑不果應澂出其不意擒之屬縣租賦諉道阻久不至郡

應澂爲立期日首輸者減分未至則償所減民惟恐後不一

月訖事吏民戴之

德慶志

郭閻字開先番禺人三預計偕登淳祐甲辰進士第擢知高

要縣有政聲秩滿授海州僉判改秩宰平江尋擢監察御史知無不言糾正奸邪不避權要其所彈擊公論莫不快焉

州廣

人物傳

吳與字可權漳浦人徙居龍溪知四會縣有惠政嘗論事憲臺燕若蒙厲聲曰乃欲效漢唐令耶答曰固願學之恨不至耳燕爲改容累遷奉議郎通判潮州廣東提刑

舊通志

李春叟字子先東莞人寶祐丙辰省試中選以誤書謹對黜廷紳交薦乃授惠州司戶有賢能聲景定間廣東提刑楊允恭狀奏除肇慶府司理常辦冤獄當路不從卽投告身於庫請歸事竟得白郡守劉叔子嘆服尋除德慶教授秩滿而歸絕意仕進乃著論語傳說補

吳文震字絃發番禺人紹定壬辰進士初試鬱林司戶權尹

有政聲又任南恩司法尤加意獄事繫者感之遷新州通判
惠政甚多

趙必瑒東莞人咸熙元年進士父崇誦同科時稱喬梓聯輝
必瑒初任高要簿尉郡檄署四會縣令邑有二人忿爭各自
殘訴於官前令毛舉細微根株相連搖動一鄉必瑒至曰彼
皆輕生豈可波及良善以長狼俗乎斥二家各收瘞鄉人德
之爲立生祠俱同上

元

呂恕字仁卿河東人至元十八年廣東宣慰副使值饑力請
賑貸存活甚眾新州有重囚上於宣司恕知其非罪不肯署
牒宣司恕徑驅囚赴市將殺之恕亦與之俱往遂不果殺恕
與司交訴於行省省竟直恕囚得不死州人德之後卒於官

廣州志

張汝弼字明之真定人元貞間廉訪司僉事巡肇慶值旱農
失有秋乃貸米二千石以賑饑民請免糧六千二百石又有
聶輝字光甫平定人大德元年廉訪僉事是歲端州自夏徂
秋西潦洊至田廬淪沒種植靡遺輝按部惻然請減糧七千
七百石郡人稱曰前有張父後有聶母

辛酉志

高芝字國瑞濟南人大德辛丑知新州清節凜然愛民禮士
惠鮮鰥寡修飾學校又常於驛路栽松竹以便行者深仁善
政久而猶存

舊通志

札忽進義香山縣達魯花赤恤民勸農察民貧者給以牛種
且減其租刻大學孝經以教民子弟皇慶二年陞知南恩州
既去民思之不置

黃通志

倉振字濟民真定人延祐辛酉知新州時搖賊蠭起振深入賊砦諭以禍福示以恩信羣搖帖然向化暇則詣學召諸生講解經義又於驛路夾植榕樹松樹先是高芝守新州行是政振實繼之故州人歌曰高松倉榕一道清風

辛酉志

按吳志云自高要南岸達新興乃嶺西海北通衢荒莽極目炎蒸之時靡所棲息行人殊苦嶺西僉事劉洵曾修高倉故事令里胥分地而植旣植而護之遣官時巡驗勤惰甚美意也然奉行者弗篤或致假此以擾農民洵去而前功復廢

高若鳳字在翁吉水人至治進士知封州興學卹民練軍養

士

江西通志

張允明天歷間知南恩州有學有爲其政績猶有存焉

黃通志

韓元善爲新州判官明達政體累擢江南行臺監察御史

明統

志

薛里吉思元統三年守新州興學校填魚塘以廣學宮土軍挾勢通徭擄掠私立名號擅權柄吉思正其罪罷之委百戶韓帖木兒領其軍由是綱紀振肅政令大行往年上糧需求百出多收斛面吉思每日詣倉監視令糧戶自概民鹽嘗和沙土及輕重其包散塩之日親臨禁止於是吏無侵欺之弊

舊通志

拜住以武勳爲千戶元統癸酉西寇至晉康拜住出與賊戰策馬逐至城西龍母橋橋已拔官軍駐橋東賊駐橋西拜住素善射發矢蹄其旗首復發矢又中一賊賊陰使人圍其後拜住計窮瞋目罵曰汝鼠輩自速死早晚皆成擒矣賊鎗墜

馬遵被害郡人憐之元統甲戌總管郭友立祠祀焉德慶志

白景亮南陽人元統甲戌任南恩知州有循吏之政性廉介

自奉甚薄妻尤儉約惟以脫粟對飯而已部使者上聞詔褒

美賜以宮錦明統志

謝必昌廬陵人至元庚辰知南恩州均徭役豐委積興廟學

豪右有侵學田者皆奪而還之歲飢發廩賑救賴全活者以

萬計遇旱禱雨屢致有秋州人頌其德辛酉志

王良字士純真定藁城人至正十年以萬戶鎮德慶路撫綏

兵民時江水暴漲民多墊餒良出廩賑之寇來襲郡發兵迎

擊焚其舟以歸平居恂恂雅飭延禮賓儒威德著聞楊鑄撰

政蹟碑記其事明統志

楊廷璧字君璋東平路恩州人古端兩邑時為獠寇笑境日

以殺戮掠賣爲事鄉邑苦不忍言至正庚寅璧以昭勇大將軍廣西道宣慰使督師破賊端民均拜更生自鐫石以紀其事

七星巖

平寇記

迭里迷失至正二十三年守新州爲達魯花赤州右有子城環衛州治年久壞庚寅歲臘月西寇八城焚掠殆盡後猺賊李廣劉天海作亂民無所避迷失至卽修城浚濠設串橋串樓於子城內架屋有警許民入居後南恩州吳元良之寇民賴城以免害焉

新興志

羅蒙正字希呂其先廬陵人父稽叔遊學新會遂家焉蒙正資稟秀拔勤學強記諸史百家無不成誦甫弱冠聞肇慶羅斗明工詩往從之斗明嘉其誠又同族譜悉以詩法授之未幾領潮廣省檄爲高州學正秩滿歸授徒於古岡書院至正

丁亥赴省試遇武功銓人或勸其借注巡檢以詩答之曰儒冠不是將軍具只作當年措大看心志落落遭元季亂避地郡城復用薦爲南恩州教授時州判吳元良素慕蒙正名一見歡如平生元良有志併據一方欲用爲幕賓力辭不就後因病以詩謝云願賜一廛閒養病簡編燈火伴青衿未幾卒元良禮葬之有詩集數卷傳於鄉

廣州人
物傳

張度字景儀增城人風采偉特未冠時有相者見之曰山角洲庭柱石材也以才學聞元季舉茂才爲高要縣學教諭遭亂棄官歸杜門讀書而業益進洪武壬子舉於鄉計偕如京師會罷科舉選賢能補憲職遂擢監察御史譽望震一時歷官吏部尙書

廣州志

史格爵里無可考常率兵徇定廣西諸州遂下肇慶德慶封

川皆蠲三年田租時益王傳檄嶺海嶺之東西響應議者欲棄肇慶德慶封川併兵戍梧州格曰委地撤備是示怯也增兵戍之而獲安

嘉靖志

陳文仲字仲常巴陵人襲父鎮撫至正三年陞德慶路總管萬戶至正癸巳西寇入境內文仲同郡人李質協守之保有封川德慶二郡廖永忠兵至見文仲與李質深器重之

舊通志

宦績二 明

陶諧

張岳

吳桂芳

凌雲翼

吳文華以上總督

楊信民

盛景

陳應以上撫按布政

毛吉

陶魯

吳廷舉

王大用

羅僑

李香

高大節

張垣

王國楨

李材

王泮

吳瑞麟以上分守巡道

黃德明

步信從

王全

毛添佐

王瑩

黃瑜

李燧

歐陽恂

黃琥

黃頤

黃瑗

曾直

錢鐸

袁載

盧璘

鄒光祚

楊棐

高萃

鄭一麟

陳鴻漸

陳濂

戴燿

張瑀以上知府

饒秉鑑

張吉

陳勉

林春澤

陳露

郭文通以上同知

何文質

李敏

傅獻策

夏清以上通判

李春熙

羅應台

陶爽齡以上推官

高俊授教

劉宗貴

陸駒

何宏仁

左濬

毛羽

蕭棟

李守俊以上高要縣知縣

岳鎮

黃敬止王廷玉和伯川

梁潛

張邦達

顏寶

李敬中

楊渙

張思齊

蕭樟

方選

陳一元

陳祖訓

以上四會縣知縣

張游

四會縣教諭

程希顥

譚安

方冊

陳綸

鍾鯨

蒙惠

王民順

姚舜牧

楊成喬

以上新興縣知縣

陳漢

新興縣訓導

孫守正

新興縣縣丞

黃景明

趙清

李通

李福海

龔墳

黃寬

黃憲清

傅慶貼

雷啟御

錢兆元

王魁春

以上陽春縣知縣

吳銓

陽春縣教諭

吳子育

陽春縣縣丞

徐均

江有源

以上陽春縣主簿

黃重

方嵩

柯昌

吳煥章

鄧壽鼎

林恭章

管學經

萬日軾

陳即登

李右讜

侯偉時

孫自修

馬之瑛

以上陽江縣知縣

鄧全慎

陽江縣教諭

張淮

陽江縣丞

林應樑

陽江縣典史

唐簡

陳坡

徐純

張佐治

韓國藩

熊德陽

施樑

蕭時勉

郭斌

以上高明縣知縣

練益

高明縣訓導

李士文

楊濬

余奕黃

以上高明縣教諭

黃觀

高明縣丞

鄒級

恩平縣知縣

桂宗美

費頤

以上恩平縣教諭

韋弁

黃南金

以上廣寧縣知縣

孫彬

黃廣

周冕

張廊

李瑛 劉福貞

楊純

管清

王淮

田惟祐

周文漢

一作煥以上
德慶州知州

鄒熙

朱智

蔣智

以上德慶
州同

陳琚

德慶州
判

范鑣

丁華

潘海

吳蕙

方尙祖

周洪德

以上封川
縣知縣

陳顯

封川縣
教諭

萬顯

郭纓

以上封川
縣訓導

陳順

封川縣
典史

陳潛中

蔣景忠

張琮

朱瓊

蘇善

陳琳

黃瑜

莊科

以上開建
縣知縣

花茂

王英

周昌

程鑒

陳策

陳相

王瑾

楊瑄

胡兆隆

鄒維勳以上武職

明

陶諧字世和會稽人進士正德初疏戒逸遊斥大關邱聚劉瑾輩蠱惑之罪瑾等中傷無所得乃以他事杖之削其職尋詔責廷臣朋黨罷輔臣劉謝及知名士五十二人諧在其中下詔獄謫戍肅州瑾誅放還嘉靖初歷官都御史總督兩廣陽春德慶新興渠賊恃險聚眾縱橫剽掠已數十年至是討平銘西山而還舊通志

案職官載總督首吳桂芳以其始駐肇慶也至宦績惟有功德於斯土者登之固不泛及亦無所限云

張岳福建惠安人進士嘉靖間擢副都御史提督兩粵約諸大吏不得持一物相饋諸大吏惴惴惟謹苞苴遏絕裁公私

供億歲省千餘金乙巳春封川猺民煽亂集諸道兵討平之

晉秩少司馬

崇正志

吳桂芳字子實新建人進士嘉靖丁巳以叅政分守嶺西先是藩臬分司皆居會城以時行部而已桂芳至關公署移家居之豈弟愛民擇士之良者館於松臺書院躬課焉甲子總督兩廣郡人喜其復臨鼓舞迎之時東省軍興開府於肇大修學宮建尊經閣自爲記暇日進諸生講學官屬咸在秩如也在鎮五載遷兵部左侍郎陞工部尙書所著有兩廣疏議

師暇瑣言

高要志

凌雲翼太倉州人嘉靖二十六年進士萬厯初提督兩廣軍務時寇盜畧盡尋進征羅旁羅旁在德慶州上下江界東西兩山間延袤七百里成化中韓雍經畧西山頗安輯惟東山

猺阻深箐剽掠雲翼乃大集兵令兩廣總兵張元勳李錫將之四閱月克巢五百六十俘斬招降四萬二千八百餘人岑溪六十三山七山那留連城諸處鄰境猺獍皆懼賊首潘積善求撫雲翼奏設官戍之論功加右都御史兼兵部侍郎賜緋魚服乃改瀧水縣為羅定州設監司叅將積患頓息六年夏與巡撫吳文華討平河池晡咳北三諸猺又捕斬廣東大

廟諸山賊嶺表悉定

明史本傳

吳文華字子彬連江人嘉靖三十五年進士萬厯中總督兩

廣軍務巡撫廣東進右都御史

明史郭應聘傳

文華廉潔嚴重在鎮

三年文武諸將吏無敢載金帛至者

金通志

南門之征有山稅

又有物稅差次減之即私養錢置不用藏筆牘兩府至數萬

文華泊持大體不事苛小清靜與民休息作殘墨二戒以訓

官屬盜賊起旋卽誅夷第誅二三渠首餘皆散歸南畝

萬應志

先是乙酉東營悍卒以罪被執遂大鼓譟挾主將抗有司後事雖寢文華曰此廣州腹心之疾也激之則生亂吾當密除之乃調操於端州防汛於南頭以分其勢比閱操廣州潛得其首惡數人以犯令戮之三軍股栗心知其討前罪也其威惠並用如此肇慶大水蕩民廬產文華乘城望谷嗟嘆息計畫生養請減明年田租擢去而民思之祠于學宮左

郡志

楊信民新昌人永樂貢生刑科給事中正統十一年廣東左叅議時猺賊爲患往來德慶瀧水間防禦公平廉惠民甚德之十四年以劾貪被逮耆老何寧等詣闕上書訟得復職勅守白羊關寧等又言賊黃蕭養作亂願得信民還廣則賊可弭乃陞僉都御史巡撫廣東信民至賊皆解散蕭養就擒信

民尋卒民又請建祠祀焉成化五年賜諡恭惠

吳志

盛景吳江人景泰間以監察御史按廣年踰弱冠而明習法律老吏見其文牘莫不縮頸時瀧水賊猖獗景單騎諭之遂降効巡撫侍郎揭稽不法風力振一時以言事過許左遷典史官止知府

吳志

陳疊字尙勉漳浦人進士吏部考功郎中天順四年廣東盜賊縱橫廷議推疊乃除布政使時英廟復辟勵精爲治召至內殿賜宴遣之疊至廣密相事機以撫以捕收新興縣賊撫定德慶州徭地方以寧遂致仕歸

漳州志

毛吉字宗吉餘姚人景泰進士天順五年分巡雷廉高三郡僉事時民遭賊殺掠數百里無烟火吉率兵平之以功陞副使璽書獎諭委以一方新會告急吉統萬人行至火燈遲遇

賊破之乘勝逐北至恩平雲岫山去賊壁十餘里時二鼓矣傳命諸將曰賊後山箐而面畝田敗必望山而遯兩軍先據後山我以精銳搗其中合擊之賊可盡擒矣約黎明進兵是夜無星月遂後期不得已三軍齊進賊果敗奔後山吉命百戶潘甲率千人據賊壁士爭鹵獲賊從高見之馳下殺潘甲士皆奔潰吉勒馬持刀大呼曰止不能止從吏廖振等勸吉引避圖再舉吉曰吾誓不與此賊俱生汝等亟走勿顧我言未已賊七八人持鎗趨吉吉且罵且敵猶手斷一人臂遂被害是日雷雨大作山谷皆震動連日陰晦又八日始得屍面如生昇歸廣城官吏士民弔哭者相屬事聞贈通議大夫廣東按察使諡忠襄錄其子科爲國子生祠于雲岫山後新會

恩平省城皆建祠

舊志

陶魯字自強鬱林人以父成浙江僉事死事蔭八監歷升廣東按察司僉事副使按察使專治盜賊魯有膽畧高雷廉肇諸郡流賊連年攻劫悉心備禦所戰皆捷嘗平瀧水獠璽書獎勵成化間城新興又平恩平陽江賊立恩平縣凡城池公署學校經營規畫皆有可垂久遠進湖廣左布政使兼廣東按察副使撫治兩廣

辛酉志

吳廷舉字獻臣蒼梧人以進士知順德縣九載乃遷成都同知正德初廣東盜起擢兵備僉事治兵清遠討平十三村池水盜進叅議副使進廣東右布政使十年嶺西獠獍作亂兼兵備副使撫治廣肇諸府今新興縣道東北一帶吳大人松廷舉所植也官至南京工部尙書廷舉身長而瘠面如削瓜敝衣穿帶不修藻飾而神采英毅言行必信人鮮能奪之自

八仕潔已字民力行教化砥礪名節不苟不吐屢涉阨危妻
子饑寒而施予不倦田廬不辦而有書萬卷卒年六十六貧
不能殮都御史姚鏌爲之經理崔銑稱其貞才潔履厚行定
力後諡清惠

名臣記

王大用字時行莆田人進士嘉靖初廣東兵備副使素有才
畧時嶺西多警督府檄大用經畧晝夜狂奔間威令嚴明相
機擒剿新興猺狼諸賊殲滅殆盡後陽江渠賊嚴阮冠陽春
大用督兵追入龐崗會分守叅政羅僑兵至斬獲甚眾三邑
之民賴焉官至兵部侍郎

辛酉志

羅僑

縣志作僑

字惟升青水人進士嘉靖初廣東左叅政分守嶺

西時猺賊爲害僑示禍福招徠猺目梁烏皮三百餘家民賴
以安先是仕者多假寓會城待遷僑雖瘴鄉僻邑不辭跋涉

通歷以詢民瘼莅政嚴明作興學校嘗表章忠節太傅諸祠

未幾上疏乞休不待報而去士論高之

舊志

李香字汝蘭分宜人進士嘉靖間廣東僉事分巡嶺西值多故香下車修城池繕營堡謹烽堠焦勞經畫訓練士卒四會有寇官軍禦之弗克香毅然臨戎督師深入潭圃梅崗獲賊而返招徠獠獠二千餘人還新興新會陽江三縣復業以憂去士民思之歷遷大理卿

嘉靖志

高大節

高一字商

字孟堅安陸州人進士嘉靖間廣東僉事分巡

嶺西性廉潔諳權變徭獠爲梗大節開諭以義選其子弟聚城令社師教之於是江道始平後征黎有功陞副都御史

舊志

張烜宜山人進士嘉靖間廣東右叅政分守嶺西正直廉靜

尤重文學政餘常至松臺書院勸課諸生歷遷副都御史

嘉靖

王國楨浙江山陰人嘉靖戊戌成進士授行人歷都諫毅然以經世爲己任劾本兵大臣徇私廢法直聲動天下時嚴嵩擅權諸所論列侃侃與嵩左於是出爲廣東叅政分守嶺西與督府談愷議征大羅山寇直搗其穴斬馘二千有奇民賴安輯綏撫之道保釐之政務殫心力頌聲載道肇人立祠於綏水與談愷王鈞及同知呂天恩並祀歷官福建左布政使

郝通志

李材字孟誠豐城人進士隆慶五年嶺西兵備僉事時恩陽會寧界中懷寧普三村賊熾劫恩平屠海萌破蓮塘痛毒諸縣督府殷正茂以屬材材約叅將梁守愚及遊擊王瑞屯兵

恩平近地若常戍然明年分兩軍出其不意克之又執渠金
燐磔于市又以十三村與三巢羽翼藉其壯者爲兵征南鄉
阡于道而遣陳紹經圍十三村誅之以立永鎮永安等屯使
兵自耕而食諸縣以寧先是當事者畏懦材慷慨敢爲賊卒
殲夷好談道所至闢書院聚徒講學士多興起而端溪書院
在郡中督府殷正茂落其額遂拂衣去起鄖陽道御史

高要新興

陽江
三志

王泮字宗魯山陰人萬曆二年進士八年知肇慶府十二年
遷按察司副使分巡嶺西駐肇慶慈愛和易士民見者語次
尋繹甚有恩惠未嘗疾言遽色加人而確然有執雖門生故
交無私也好爲民興利導後瀝水繇城東石頂洩潦八江歲
收畝一種且束地脉爲橋曰躍龍建浮屠於石頂上鎮之通

北港入高明倉步水又建浮屠于高明東郊大治肇慶陽江
學宮又爲陽春縣置田便於士民爲之不惜饑渴郡爲督府
所駐而粵藩臬使者若四方之賓無日不至饋櫛出日戾不
遑暇食人人得其歡心盡事悉中竅幕府甚重之府江珠池
之役皆有勞焉泮性恬淡自奉如寒士居官廉潔焚香靜坐
若禪室然詩辭冲雅書法遒麗有右丞右軍之風粵中文士
皆來就正十六年遷湖廣叅政高要高明士民遮留泣下各
建祠祀之

萬厯志

吳瑞麟字在賢浙西海鹽人萬厯戊午舉於鄉明年成進士
補廣東叅政驛傳道攝分守嶺西事嶺西爲制府所莅時總
制張公以賞罰失平致悍卒四千人倡亂歃血樹旗肇慶郭
門不啟公時已解紱至廣州聞變卽馳至肇慶告張公以開

門示信復馳檄亂兵語以利害亂兵見公檄相顧曰吳公必
不負我曹遂解甲聽撫是時微公檄還肇慶幾殆後官至鄖
撫攝沅事及甲申之難感憤成疾卒

侯峒曾
撰家傳

黃德明字本初河中人洪武元年以江西省郎中攝肇慶府
事時庶務草創力爲修建築城浚池百廢具舉以才能稱

志

步從信洪武二年肇慶知府時府學爲元季兵亂所毀從信
經營草昧首訪舊址建廟學凡社稷山川厲壇以次創建規
畫有條郡治爲之改觀

舊志

王全高密人洪武初由薦辟授禮科給事中出爲九江府同
知十六年擢知肇慶府嚴以律已寬以蒞民剴劇裁變不露
聲色而一郡稱美雖被罰者亦無所怨秩滿去人皆賢之

黃通

志

毛添佐字公輔麻城人永樂間由德慶知州署肇慶府

郝通志

守正奉公敬賢禮士庶務修舉民思慕之

黃通志

王營鄞縣人宣德六年由刑科給事中出守肇慶興利革弊
知所先務高要有李伯從者爲營家所誣坐不孝繼母母卒
而獄久不決營至立訊其非而釋之瀧水有鄧顯佐者以蕉
根造僞印事露繫獄經年營察其不成篆文竟得減死城西
失火延燒民居營籲天而火隨滅增修水利作興學校禮賢

下士切于愛民至今頌之

同上

黃瑜字仲美臨桂人正統九年舉人授宛州府同知有惠政
遷本府知府遭喪歸適兩廣徭寇猖獗都御史葉盛請以瑜
爲肇慶知府至則剔蠹剷弊百廢漸興化所屬諸蠻聽詣郡

自行首服祀包孝肅以風後進都御史韓雍嘉其治行奏請

加職以布政司叅政掌府事先後歷十五年郡人感之廣西通志

李燧天白人成化十四年由進士知肇慶府學問該博胸次

豁達常督儒生講學躬行畎畝勞民勸耕士民樂業申免太

監進取異禽民甚稱快竟以剛介獲謗去官歸舟行李蕭然

士論惜之黃通志

歐陽恂字誠之安福人進士正德甲戌由南吏部郎中知肇

慶府興學校正祀典禮賢養老豈弟臨民凡鄉賢之嗣弗振

者躬造其門訓諭有頑民健訟梗化恂毅然曰此非吾民也

欲解印綬去士民苦留頑梗者咸感悟歲大旱恂降服徒行

率吏民拜禱於道越日雨降民大悅節推楊某卒于官恂殮

之歸其喪人以爲有古君子風丁內艱去起補常德遷兩淮

運使

郝通志

黃琥字瑩之豐城人領鄉薦任臨洮同知宏治元年知肇慶府府隍舊有魚利緡錢三百以供守土中貴隍實無魚錢則歲辦於民琥至罷之宏治己酉引疾解職民急走當道乞留不得去積粟儲荒至萬餘石捍潮築隄二百里以德慶瀧水功擢廣東叅政尋乞休進嘉議大夫有直庵集舊通志

黃暉字伯望莆田人進士宏治十七年知肇慶府決獄精明凡利於民者悉心爲之令行禁止屬吏警憚不敢爲隱鎮守太監索濠塘蕉布銀力革之民感其德陞廣東叅政辛酉志

黃瑗字純玉晉江人進士正德間知肇慶府心存撫字修隄防輯戎事恩平賊首蘇寓唐國欽相繼作亂瑗集兵民剿滅

之上

會直字叔溫吉水人宏治壬戌進士正德十六年知肇慶府廉潔有爲片言折獄吏不敢欺表章濂溪諸賢入祠祀歷官大理寺少卿

舊志

錢鐸字振之江南通州人正德辛巳第進士嘉靖初爲刑部主事以諫大禮受杖瀕死得甦累官署郎中考績書最會肇缺守思得人以遇寇虐撫瘡痍吏部推鐸補之既蒞郡首視郡邑學校

秦集

傾圮力言於巡按御史吳麟并遷於城外舊址

舊志

廟燬煥然由是魁鄉試者踵接郡人謀創生祠報功以公力遜而止其他賑困窮汰冗費嚴法令杜請託立保伍建

公署凡百興革無一不合民情者御史薦於朝有曰剛明自持法平政舉廉靜不擾吏畏民懷蓋覈實云以外艱去行李

蕭然後官至廣西按察副使

秦集

袁載字安道慈谿人進士嘉靖間知肇慶府嚴慎勸勵節用

愛民廢墜修舉陞山東副使

嘉靖志

盧璘字秀夫餘姚人進士嘉靖丙辰知肇慶府剛直自持節省浮費郡志久缺毅然創修時督府移鎮郡城征四會大羅山賊殲思贊籌轉饟不置議立廣寧縣璘之功也陞福建運使

同上

鄒光祚字承卿鄱陽人進士嘉靖四十一年由尙書郎出守肇慶清修嚴飭重鄉約興學校修文廟祭器擇郡中子弟教以樂歌祭日禮器庀整琴瑟叶奏父老園門以爲未嘗見也兵變挺身出擊遂以帖然郡人頌之五載遷雲南副使有生

祠曰孚德

高要舊志

楊棐建安人進士萬曆甲戌知肇慶府醇和清介政平訟簡

吏畏民懷羅旁之役督府諭高要令市馬百令任之矣裴曰
高州乃有善馬馬必三四十金高要安得金三四千而令市
馬百乎卒減十之九縣民日轉饑上山槌斃其勞且曰兵無
所獲而以爲馘必此輩也戒至河反令士卒自負之力裁浮
冗節用愛民嘗畫十餘條上之未行而卒士民哀哭喪歸奔
送爲之罷市

獻徵錄

高萃字升伯萬厯甲戌進士官刑曹出知肇慶府興利惠民
置田贍士多從淳厚肇人肖像祀之

浙江通志

鄭一麟浙江山陰人萬厯丁丑進士甲申由兵部郎中知肇
慶府事前守王泮清慎簡廉難乎其繼一麟爲政淳大有體
不屑苛察人以是並賢之肇慶值大水一麟朝夕露次步禱
拯溺賑饑不遺餘力又分遣鄉落撫恤所存活以萬計水退

補築諸决堤親視版牘修橋建閘備水利民一如前守剏塔
於新江口爲郡城利凡士民所急知無不爲秩滿遷去士民
遮留不及若失慈父焉

萬曆志

陳鴻漸字雲遠福建長樂人由鄉科爲廣州同知潔身執法
人無敢干以私九載遷肇慶太守清操逾勵俸入之外一無
所染先時郡守多闕佐貳署攝皆奉其上及鴻漸至漠然部
臺監司缺望而屬邑多縱恣不率鴻漸喟然嘆曰吾起孝廉
無所援而守大郡於分溢矣不獲于上不信于下戀此何爲

故遂移疾去

崇正志

陳濂字道源福建惠安人萬曆丙戌進士由部屬山守肇慶
府潔清自持不以法假人培養士類躬課文藝不勸癸卯登
賢書者遂至九人創高要高明尊經閣拓府庠明倫堂增修

郡城設東教場建衛署軍器庫禁民服毒募采胡蔓草務絕其根凡關切士民利病若加諸身期暢達掃除爲快秩滿轉兵憲駐肇又數載清風濺澤所被嶺西最久

戴熺福建長泰人進士萬厯四十年守肇慶府戴爲長泰右族弟兄相繼宦嶺表兄燦嶺東叅議燿兩廣總督都御史熺始至是歲大水賑饑恤死惠蹟甚多築墟堤以杜後患民尤德之秩滿轉海南副使擢廣東右布政卒於官橐無羨金士民建清風堂於包孝肅祠後歲時饗祀云

俱同上

張瑀江西豐城縣舉人崇正十五年任肇慶府知府公正廉明尤精堪輿術因張朝鼎甄畧宏等赴郡聯請建縣瑀奉檄至開平屯相陰陽度揆地利詳覆大吏題允建縣考卜之功肇此至今誦之

開平志

饒秉鑑廣昌舉人景泰間肇慶同知公正廉明聽訟理財皆
愜人心嘗奉檄瀧水建城遷學井然就緒以平寇功陞廉州

知府

吳志

張吉字克修號翼齋餘干人成化辛丑進士除工部營繕司
主事以疏劾左道李孜省妖僧繼曉貶景東通判孝廟初轉
肇慶同知肇慶當蒼梧下流頻年勞苦吉相其地曰是可以
堤同列不以爲然吉獨身任之發民就役不令而集當水瀑
漲則乘小舟而視眾莫測其至夜雨不止憂形于色坐以待
旦經營勞瘁歷三載而後成隄按卽豐樂大隄亘三縣高要四會南海復爲
寶以殺衝決之勢民至今號寶曰張公寶隄曰翼齋隄獻徵錄
累官至貴州布政使嘉靖中潦水常溢民賴隄捍益思其惠
乃於寶查都立張公祠祀之舊志

陳勉字汝勉黃巖人宏治間肇慶同知有文學清介自勵庖

無梁肉或以爲矯勿恤也陞太平府知府

辛酉志

林春澤字德敷侯官人正德甲戌進士授戶部主事出爲肇

慶府同知島寇掠高州承檄攝篆春澤習知徭兵害民悉罷

遣之代以土著部署方畧寇次第就擒

福建通志

陳露晉江舉人嘉靖三十二年肇慶府同知署德慶州事時

狼賊張快馬黃海龍倚徭爲援剽掠富祿儒林等鄉露遣間

以離其黨令約降者犒之設覆道左至日椎牛醢酒諸賊畢

至覆起就擒無脫者誅其魁餘皆受降嘗至四會民饑賑之

德慶四會皆爲立祠子紹功以進士推官廣州稍遷潯州同

知

郝通志

郭文通慶都人嘉靖末以掾爲碣石衛經歷時征賊伍端叅

將謝勅失機連營數十皆潰獨文通所部大開營門使卒環坐持滿賊不敢逼居民賴之後屢征賊有功擢肇慶同知嘗語人曰吾有三不寶不寶官不寶財不寶命是以掾吏積功官至大夫云

阮通志

何文質永樂中肇慶府通判處心廉介蒞事公勤嚴而不苛

吏民悅之

明統志

李敏廣昌人成化間肇慶府通判平易近民行部至新興見廟學圯壞謀於掌府事叅政黃瑜督工修葺廟學改觀士民

愛戴

新興志

傅獻策馬平人宏治間肇慶府通判愷悌得民廉潔自守進秩同知始終如一郡人稱爲傅齋公以其廉也後勘權貴子弟執法不撓竟以此罷官輿論惜之

阮通志

夏涓字惟初餘姚人領鄉薦從王守仁遊嘉靖二十八年

吳志

作十授肇慶府通判督儲先是積弊斗級有斛面該徵有年

例轄衙數以羊鹿鵝鴨發倉糞養撥費滋甚涓至以節愛爲

本悉革之故民樂輸旬月而儲務舉督府以其能檄往南雄

權商一毫不入私橐遷思明府同知無何卒喪過端民聚哭

之

黃通志

李春熙字臯如建寧人萬厯戊戌進士爲肇慶推官監軍征

交趾禁妄殺削冒功所俘獲平民廉實放歸活千餘人

福建志

羅應白字德臣永寧衛舉人爲肇慶推官以廉平聞署郡郡

人德之署德慶州州人德之暇卽吟咏自適遷路南知州行

李蕭然

萬厯志

陶奭齡浙江會稽人大司成望齡之弟奭齡少俊穎與兄齊

名晉江李文清負人倫鑒每以兄名位推之數蹶南宮乃用鄉舉謁選得肇慶司李慮獄囚哀矜惻怛嚴御伍伯輩不使索庭下一錢所平反案牘如山一覽無遺洞中竅與老胥惴惴不敢窺也兄弟悉精內典爽齡尤多方外交嘗謂作官須得禪意轉濟寧州守遂解組還里

崇正志

高俊字士偉莆田人舉人宏治六年肇慶府學教授平易謙謹日與諸生講解經義勉以爲己之功雖隆冬盛暑不輟諸生饋必固却曰吾職尙慮未稱何以此爲貧者捐俸周恤陞衡州府推官卒士追慕之

辛酉志

劉宗貴靖州人洪武三十一年以都察院司務遷高要知縣公勤蒞政平易近民後以憂去民懷之

舊志

陸駒吳縣人正統間知高要縣才識明敏應變裕如時海賊

黃蕭養之亂百費皆給而不擾於民稱爲能吏

辛酉志

何宏仁高要令端溪一水受滇黔交桂諸流每夏潦爲民灾
宏仁躬率圩堤增修之農事以賴端故有權關在事者多假
手胥吏掣視不時商人苦之宏仁屬次視事率親閱加恤焉
癸未以外艱去民遮留追送者數百里不絕

魏叔子集

左濟寧德舉人宏治八年知高要縣廉潔惠愛縣當兩廣之
衝供億旁午事集而民不擾用節而上不疑民甚德之遷惠
州府通判士民攀臥至不得行官橐泊如也高要循良以濟
稱最焉

舊志

毛羽臨桂舉人嘉靖間高要知縣禮士愛民廉而不激寬而
不弛縣當衝劇而應酬自給居民不擾視事甫半載政治一
新八觀卒于途喪過端邑人聚哀者相屬焉

嘉靖志

蕭棟宣化舉人嘉靖四十三年令高要縣廉明蒞衆豈弟作
人治逾年而政通人和刑清訟理創遷縣治民樂赴工無何
以憂去士民扳轅臥轍若失慈母然高要二百年來賢令以
棟爲最後補平江倅衡州陞知州所至以賢聲著萬歷志
李守俊宜興人萬厯辛丑進士明年知高要令惻惻不嫺儀
節初至嘗倒執手板郡守笑而教之比期年化洽於民縣以
大治治行爲嶺表最孤行無援秩滿轉南曹郎出爲郡守歷
官左布政所至無赫赫之績而惇誠識大體俱令去後有思

崇正志

岳鎮北平人洪武初知四會縣奉公循理緩刑節用勞來歸

附民甚懷之

吳志

黃敬止江西人洪武二十年知四會縣爲政簡靜禮賢愛民

民有去後思又有金華王廷王者爲丞矢心佐政撫恤下民四川穆伯川者爲簿廉潔公勤上下愛戴皆洪武間四會邑佐之良者

舊志

梁潛字用之泰和人洪武丙子鄉貢進士明年授四川蒼溪縣學訓導又明年用薦除四會知縣推誠愛民剋宿弊崇寬政導民以禮而尤勤於撫字稍暇輒就學舍授業諸生歲餘民咸悅服爭訟寢息流徙來歸縣有龍橋河世傳有廉吏卽清自潛至迄去河水澄潔可鑑又明年改陽江興利除害政簡刑清後調知陽春治如四會陽春徭獠環處易擾難安潛待之如子而不徇於法民亦盡誠事之敬恭命令惟恐不及所歷之處將去人皆遮道留之至有流涕者永樂年徵修實錄陞翰林院脩撰五年兼右春坊贊善有泊庵集行於世

舊志

志

張邦達開化人永樂五年以監生知四會縣威儀可象清慎不苟後擢監察御史

舊志

顏寶亨太和龍溪人永樂中知四會縣溫厚公正寬猛得宜奏除虛糧九百石尤篤意學校凡橋梁圩岸悉致堅完藩臬郡守交章薦之遷秩去邑人乞留者千數祀崇賢祠

明統志

李敬中上高人以吏主簿上元縣長於占驗從太宗渡江奏有風請急渡未數里舟果爲風覆後因事謫戍一日上見御衣水漬思之召除四會知縣發奸摘伏人稱神明

吳志

楊渙字德濟泰和人由進士正統間知四會縣廉能惠愛甚得民心邑有鈎吻草貧民爭鬪輒服此誣人多被其害渙遍取草根焚之期年種絕其訟遂止黃寇逼境民懼欲逃渙率

兵禦守民賴以安都御史楊信民薦陞廣東按察司僉事

舊志

張思齊字希賢蘄州人進士正德初四會知縣請免水夫築

圩岸判決如流令行禁止民信服之歷官廣東按察使

舊志

蕭樟字國材永新人正德戊寅以進士知四會縣撙節財用

修城取諸地稅建橋取諸官田民共分班積贖日錢以脩不

虞之用在任六年百姓庶富嘗修邑志擢刑部主事民爲立

碑

吳志

方選浮梁人正德九年以進士知四會縣不以家累自隨清

介自持商人河稅錢望甲值日徵收常例皆革之爲政存大

體節用裕民遷秩去

郝通志

陳一元字太始侯官人進士萬厯中爲四會令高才博覽英

邁善斷以清慎勤自矢善訓士子文教一新請學使廣額進

取三十五名凡事有利於民者拮据圖成建橋梁修堤渡輕徭役革重耗獄無冤滯里無夜呼上官嘉其卓績調治南海後又令嘉定由是擢御史晉府尹皆自綏發輒綏人尸祀之

舊通

志

陳祖訓字昭華海寧人萬厯中由舉人任四會令課士撫民伸雪冤滯吏胥畏其英敏皆奉法不敢違約已裕民寬嚴互用一切羨耗饋送盡謝絕云

郝志

張濬字文哲閩縣人天順己卯鄉薦成化中授四會教諭尋擢饒平令興學勸農廉能公恕先是濬在四會有海寇嘗以策干總兵陳銳督府識其名至是海寇充斥檄督揭陽四邑兵禦之賊平功未錄人惜焉

福建通志

程希顥臨川人洪武初由舉人爲新興知縣作興土類勸農

桑考滿去人思之舊通志

譚安宜春人永樂元年知新興縣寬厚公平百廢具興秩滿

去民思之舊志

方冊德興人宣德元年知新興縣正大公勤秩滿士民不忍

其去後官至按察使吳志

陳綸字孔綸南平人景泰庚午舉人成化初知新興縣時流

寇充斥所司屢招不服巡撫總兵統大軍欲進屠之綸請緩

師詣壘撫諭皆稽首降誅其渠魁所活萬計福建通志

鍾鯨字躍海廬陵人少遊學白鹿洞知名當世宏治三年知

新興令身無盛衣厨無魚肉侍無媵妾抑豪強恤黎庶有古

君子風而剛介寡合六年調去民共惜之黃通志

蒙惠蒼梧人宏治七年知新興縣巡行阡陌以勸農為急務

稍暇則訓勉諸生士民懷之官至興化府知府

郝通志

王民順字道服金谿人隆慶辛未進士初令廣寧期年以能治劇移新興爲治以身爲本正風俗禁賭訟事無巨細皆親決吏不敢欺暇則詣筠城書院與搢紳諸生講學嘗殲芙蓉都賊百餘自是腰古官道無剽掠之患東門河經涉者衆建文昌橋民甚德之居三年召爲御史官至雲南布政

郝通志
新興志

姚舜牧字牧之烏程人萬厯間由舉人知新興縣稟質聰明遇事敏練悉心以訪民隱釐弊清蠹案牘無留發粟賑饑區畫得所里甲向苦差役爲立月頭倣僱役法行之無弊修志書作五經疑問子祚端萬厯乙未登進士爲名御史

郝通志

楊成喬字維嶽當途人萬厯辛丑進士三十年知新興縣依

月頭良法行之禁黥役再充除清軍常例免人命株連豁賊情板害建塔修橋課士賑貧不一而足尤精藻鑑癸卯廣東鼎元黃士俊出其門倫肇修黃聖期皆其賞拔士也

崇正志
參郡通

陳漢閩縣人正統七年新興學訓導經明行修訓誨不倦時寇攻城漢設策禦敵賊遂散去有司以其能檄往招撫賊首羅寅弟等二萬餘人聞風向服邑民賴之

辛酉志

孫守正洪武二年領印爲新興丞創建公署百廢修舉振興

學校撫恤黎庶

吳志

黃景明洪武初知陽春縣律身廉慎爲政寬恕與民約信人

皆悅服之

黃通志

趙清洪武末任陽春知縣爲政急於先務增修城池立敵樓

時猺寇擾民奏調官軍鎮守民賴以安

陽春志

李通桂平人永樂十二年知陽春縣敦厚公平削除苛政案

無留牘士民頌德焉

史餘

李福海蒲圻人景泰間知陽春縣撫字有方尤加意於庠序

秩滿留任加六品俸後奸民林積臺以私憾誣之去任然遺

愛在人至今稱道不衰

舊志

龔墳字伯和清江人任陽春縣俗故獷頑墳以寬平爲尙不

苟取與又能興育士類境內翕然向化

金通志

黃寬字經裕晉江人正德間知陽春縣學校公署無不完繕

又於厲壇側築漏澤園

郝通志

爲政以寬爲本而猛於除暴時

猺賊剽掠寬率鄉勇討而殲之十四年復隨總督御史楊旦

及本道剿賊斬其酋蘇萬里馬文廣俘馘甚衆地方以平

陽春

志 既陞任地方多故民乞留以通判再任數年而去

吳志

黃憲清號雙江晉江舉人萬曆八年知陽春縣時奉例清丈田畝憲清爲均平賦役如舊額民德之羅定營兵作亂劫掠旁邑勢猖甚復欲寇陽春憲清集衆防守未幾賊遁去偵者聞賊首諸魁云是縣主廉明嚴肅未可輕犯蓋先聲奪人如此庚子題祀名宦

舊志

傅慶貽號有積晉江人丙戌進士萬曆二十年任陽春縣加意作人文風丕變如楊鳳鳴胡秉忠馮士琦皆其賞識士也爲政公忠廉明催科不擾一切株連概置不問民有貧無以養而父首其不孝者慶貽廉得其情捐俸給之父子感泣甲午調知高要囊橐蕭然尋陞南京戶部主事祀名宦

陽春志

雷啟御號傲弦廣西宣化舉人萬曆二十九年任陽春知縣

時璫稅鼎沸羣情洶洶啟御務節省以蘇民困語人曰此時力與角恐焰愈熾百姓益不支寬一分則民受一分之惠如借增稅而陰有侵漁是又一璫也懲黠棍生事尤嚴報最時里民新其輿蓋復任畧用之卽藏於庫戒守者曰留俟新官省加派升任去百姓祠之

同上

錢兆元號洪水浙江仁和舉人萬曆四十四年知陽春縣事每出堂拜天自矢清操雅度民愛敬之鍊於事時適增遼餉以撫字行催科而民不擾劇賊岑阿四監司屢檄拏不獲兆元設法密擒之邑以安堵報最百姓預乞留不得命及去攀轅絡繹建祠以誌去思云

吳志

王魁春號宇皆太倉州人貢生崇正六年陽春知縣下車卽詢民瘼急興除如振士風則開雲路嚴守禦則置器械全良

善則釋株連又捐公費以抵補牛餉設輕監以隔別老囚善政不可枚舉其尤大者鐵爐開鑄陳四不可而詳禁之去之日邑人築書院祠焉同上

吳銓字秉衡晉江人以歲貢授陽春教諭循循誨士貧者捐俸給之持己以敬嗜學不倦無情容無偽言無私謁妄取尋以病卒士人思之祀名宦舊志

吳子育樂平人洪武三十二年陽春縣丞以文學飾吏事爲知縣梁潛所重時邑未知學子育爲誘掖激勸士知所向遂有領鄉薦者郝通志

徐均仕爲陽春主簿陽春故春州也瘴癘巖區聞者惴慄每使者當按行輒託故避去由是縣豪得雄據爲姦縣官悉受頤指少觸之輒死前後莫敢忤考滿捆載去均至縣吏白應

往視莫大老叱曰何物大老復白是洞王也老且病家居宜就見叱曰若化外抑民伍也趣令來見不然且屠戮出雙劍示之大老聞而懼乘板輿至叱使下拜不得已蒲伏熟視諭遣之伺其語有異捕繫之獄均曰彼衆必且來刼獄戒士吏操鼓角柵其私衙自帶劍挾弓矢披甲長嘯大老二子果各將其衆來聞之皆懼莫敢前詰朝昇兩大瓜安石榴十數致饋皆黃金大珠也均不一視卽麾出械繫大老親送詣府後府官竟受賕脫大老歸數致前饋均再拒之怒欲捕治大老懼求府符調均攝陽江縣陽江亦治而均以母憂去錄微江有源新喻人洪武時爲陽春主簿勤于蒞政均平差役甚得人心舊志

黃重莆田人公度之裔也洪武三十一年知陽江縣平易清

謹用薦入爲刑部郎中陞瓊州知府

舊志

方嵩字維嶽崇仁人天順八年以監生任陽江知縣邑遭流

寇殘破嵩力請蠲賦三年居官不攜妻子衣食約儉政平訟

息成化四年督府韓雍招撫流民嵩極力撫循秩滿留再任

凡十四年乃遷秩去

吳嘉靖戊戌祀名宦祠黃通志

柯昌黃巖人宏治九年由舉人任陽江知縣操履清約決獄

明允砥礪風俗惇明典禮表張太傅祠墓陳獻章作詩贈之

昌爲人樸訥無華坐事黜去後甚見思今祀名宦

浙江通志

吳煥章字欽華莆田人嘉靖二十二年由舉人知陽江縣博

洽多能長於吏治設木鐸講鄉約以端風化雅重農事以三

收法爲民勸冬麥夏粘晚稻三稔也陽江習懶成癖高山大

原鮮盡其力自章諄諄勸諭而民始知種植之利暇則探奇

覽勝命酒賦詩歷任四年以左遷去民甚惜之

陽江志

鄧壽鼎字六泉全州舉人嘉靖三十二年知陽江縣恤民禮士庶務備舉先是邑令柯昌熊茂修建張太傅祠未竟而去壽鼎續成之以表忠義又以望海岡爲邑勝槩乃層累以助文風去任士民立祠祀之

同上

林恭章字爾肅莆田人萬厯甲辰進士知陽江縣天性廉介以教化爲先邑多猾吏章刻意懲創皆斂手然至折獄往往多哀矜流涕盛暑必躬閱獄囚日久存恤有村媪與子訟意狀甚逆章愀然動色攜入衙署跪白其母母命設飲食章盛衣冠待母側觀其母子同飯頃之母與子泣且悟叩頭謝罪乃喻遣之居無何丁母憂去之日民遮道留衣履祀之

郝通志

管學經字道明鄞縣人萬厯間由舉人令陽江對簿折獄洞

晰幽隱有神君之頌邑賦逋負日甚爲之嚴會計罷額羨人爭自勸不事鞭撻而公賦裕如旋擢郡丞去後士民勒碑思之

陽江志

萬曰軾江西人萬歷甲午由舉人知陽江縣事雅擅識度盤根錯節迎刃而解值歲饑斗米百錢軾勸賑捐措脩極勞瘁流民聚日衆穀踴貴居民皇皇競欲逐之軾曰民饑就我逐之不義乃悉意區處作糜粥食之存活以萬計

陳卽登字彼岸石城人萬歷庚戌以歲貢知陽江縣軒爽沉摯嚴以御下和以待士公餘與諸生講藝論文會學使者校士道出江邑卽登以邑去郡城五百里諸生應試艱難不憚供億請留試學使者可其議檄春江兩縣就江試遂爲例去之日士民扳轅臥轍自江郭抵恩平百餘里絡繹不絕祖道

之榮得未嘗有也

並同上

李右謫豐城人天啟五年由進士知陽江縣寬洪簡厚坦易

可觀愛民如子

郝通志

時鄭芝龍賊黨李魁奇乘潮直逼西郭

門右謫單騎喻之魁奇心折而退可謂能捍大患矣擢監察

御史民建生祠祀之

陽江志

侯偉時公安人進士崇正六年知陽江縣嚴肅自持政簡民

安

金通志

秩滿陞吏部考功司主事瀕行捐俸買田以贍邑士

陽江志

後從吳炳走城步大兵至被執不屈死

見明史及輯覽

通諡烈

愍

欽定勝朝殉節諸臣錄

孫自修字舉玉上元人崇正十年由舉人任陽江縣禮士愛

民勸輸革耗聽訟明決前此俗多輕生投繯赴水服毒殆無

虛日誣害無辜動至傾家隨巖反坐之法刁風頓息時學宮

各祠宇及四門城垣率多傾圯捐俸以次脩葺至詞章又其

餘事也

陽江志

馬之瑛字倩若桐城人崇正十四年以進士知陽江縣接士以禮作興學校寓撫字於催科民甚德之秩滿遷去載道攀

留不絕

金通志

鄧全慎字念茲廣西全州人萬歷舉人任陽江教諭文章氣節足爲師表縣志自嘉靖間蔡郡丞修葺之後四十餘年闕畧放失全慎毅然以爲己任邑志始脩有林氏子悔馬女婚女投繯慎却林氏金上其事於臺使者正林氏罪馬女得以題旌陞饒平令祀邑名宦

陽江志

張淮賀縣人由歲貢任陽江丞善書能文賀士子多出其門

居官以清慎稱

粵西文載

林應樸福建閩縣人萬厯甲辰以掾吏尉陽江革除陋例一切白役不令入鄉騷驛卽役必不可罷亦刻意嚴戢時莆陽林爾肅以廉介令江邑人謂之雙清

陽江志

唐簡南寧人舉人成化十三年爲高明令始創縣治規畫有條蒞事六年以廉能見稱

黃通志

陳坡懷安舉人嘉靖間知高明縣嚴明果斷吏民不敢欺尤勤民事修隄防勸農桑興學校庶務畢舉嘗修邑志遷桂林

通判

嘉靖志

徐純號三橋莆田舉人嘉靖三十五年任高明知縣留心撫字折獄公明立社學塾師培養士類作四勸六戒禁民爲非時狼賊反側親率僚屬分營守禦設法削平申立兵防保甲戍守民夫悉令歸農重修邑志陞廣德知州

舊縣志

張佐治平和人進士萬厯八年任高明縣潔已愛民革錢糧
火耗禁里甲陋規廣修橋梁道路便於行旅建東塔以增形
勝開南門以啟文明陞寶慶府同知同上

韓國藩字价人江寧人進士萬厯三十年知高明縣公平廉
介市無奸宄獄無繫囚鼎建尊經閣甃砌泮池一時宮牆輪
奐以內艱去後陞主事官至左通政郝通志

熊德陽

阮通志
作楊

字六龍建昌人萬厯丁未進士令高明教民

以節孝爲先遷延壽寺以益學宮人文蔚起括公費抵權額
市肆小民不罹中貴擾害他如申鄉約禁服毒給貧葬設法
催科表率士類善政未易更僕甫二歲調繁德清去士民尸
祝後行取刑科給事中舊通志

施樸字仔吾歸安人由進士萬厯四十二年知高明視事揮

筆立斷蒲鞭不用民樂輸將勤於考德校藝人士多造就不

二年調繁順德尋擢江西道御史

都通志

蕭時勉臨桂舉人令高明治尙廉平執法不憚權貴門無私

謁蒞任五載民謠召杜去後豎碑以誌遺愛

舊縣志

郭斌選富順舉人崇正七年知高明縣事清介剛果製木牌

一面大書枉法受財天誅地滅八字凡蒞政則移置堂上時

賊劫唐際村單騎追至村前又賊劫清泰是日陰冷殊甚率

衆窮追至朱六合地斬賊十數級而同部院剡薦陞南雄府

同知

高明志

練益德興人歲貢正德元年任高明縣訓導和而不苟講教

忘倦士多化之祀名宦

同上

李士文連江舉人正德十五年高明教諭寡默宏博不求赫

赫名作經義以訓諸生始終清苦處之裕如從魏莊渠講學
當道刻薦嶺南師範第一尋以外艱去生徒奔送百里後登

進士第

黃通志

官至按察使祀名宦

舊志

楊濬號沐泉景寧人歲貢嘉靖二十三年任高明教諭身教
為多士倡誨以孝弟忠信未嘗見其疾言遽色捐俸修禮器
建登賢門貧生不能給者助之去後有遺思焉

高明志

余奕黃號維復海陽舉人崇正八年署高明教諭嚴氣正性
士矜式之講課惟以文藝不問修贄捐俸修崇聖祠重建黌
門升四川推官去之日生徒遙送境外

吳志

黃觀字永若莆田人成化間任高明尉權縣篆才足治事作

興學校多所建置士類器之

舊縣志

鄒級南昌人舉人正德六年知恩平縣政知先務興學校脩

城池陞湖州通判士民思之

郡通志

桂宗美廣西臨桂舉人正德四年任恩平教諭勤考課而恤貧生時社學久廢桂創之延師爲羣衆講經學俗乃丕變秩

滿陞寧德知縣祀名宦

舊縣志

費陞廣西南寧舉人嘉靖二年恩平教諭端方有識誘諸生循循然未嘗一談及利捐俸鑄祭器貧士歲有所恤士深德之陞京山知縣祀名宦

恩平志

韋弁廣西臨桂人由舉人歷茂名知縣當事者廉其有治劇才嘉靖三十九年適廣寧初置請移之開創衆務弁有勞焉

陞廉州府同知今祀名宦

吳志

黃南金字用予江西南安人以舉人知廣寧縣事政尙嚴明抑豪右清里甲編寄者不得混淆當時稱便此外善政多端

民思祀之

廣寧志

孫彬齊東人洪武二十三年任德慶知州以德化民舉賢才興學校適歲旱民饑選富民有積蓄者令貸之民賴得所卒

於官

黃通志

黃廣字文溥同安人永樂六年由監生知德慶州政有條理興學校均徭賦招逃民減除鹽鈔民賴其惠雖徭人之強梗者亦聽其撫同上

周冕字尙文臨安人正統初知德慶州明而能斷脩城池興學校六載以憂去郝通志

張廊字宿夫汶上人舉人景泰四年知德慶州慈祥愷悌廉正自持以禮化民時征剿瀧水轉輸糧餉不置在任三月以憂去士民送之垂涕不舍黃通志

李瑛字仲玉四川宜賓人成化二年知德慶州立心慈愛行
政寬平時方與師能措軍餉民賴無傷以老疾辭都御史韓
雍嘉之給以路費又有劉福貞福建甌寧人成化二年授德
慶州同知爲政慈祥處事適宜深得民心

楊純字秉誠湖廣巴陵人成化癸卯解元始知南海清慎自
持陞德慶知州立心正大處事公平乃設一木牌刻曰受人
一毫贓私天地鬼神鑒察懸於州門其名實相副云俱同土

管淳字時雍南陵人成化末知德慶州體察民隱洪潦殃民

捐俸賑糴存活者衆閭閻德之郝通志

王淮福寧人進士宏治二年知德慶州蒞任公勤律已廉介
首重學校重建雲章閣時值征剿區處得宜民不過擾卒於

官

黃通志

田惟祐蕭山人進士正德間知德慶州周悉民瘼奏免荒稅

潛化惡俗民思其德郝通志

周文漢吳志浙江山陰人進士嘉靖間知德慶州達知從政

洞悉民瘼時西寇流劫郡邑莫敢櫻者適楚兵過德慶文漢

借兵要賊歸路盡殲之同上

鄒熙字孟輝建安舉人永樂十五年授德慶州同知宅心恬

淡蒞事公勤人稱良佐黃通志

朱智閩縣人正統間德慶州判官陞同知政聲著聞加意學

校新大成殿御書樓工雖浩繁而經理得宜民不稱擾郝通志

蔣智廣西興安人由舉人任德慶州同知成化十八年攝開

建縣事廉而不苛寬而有制民不敢犯吏不敢私興學校修

城池咸有功焉黃通志

陳琚字宗玉南寧人監生嘉靖四年任德慶州判官盡心民事憤羅旁獠賊爲患與守脩指揮李松往來江道增立營堡以脩寇發於南岸羅旁大歷等地設爲墟市使與州人互易親往監焉使其相狎以徐圖之適奸人洩其機賊乃裹甲于市中襲琚及松皆殺之總制王守仁命官祭之同上

范鑣字廷議會稽人天順六年以經明行修年富力強薦成化間授封川知縣始至家僮治圃得遺金於糞壤中亟掩之地與獠獍雜居桴鼓數警編戶單丁鑣孚以誠信煦以慈惠民安樂之邑庠有東山塘堪輿家云東塘築風水足遂捐俸浚治而歸其利於學以給諸生未三載乞終養去

郝通志

丁華同安人成化二十年知封川縣剛毅果斷省節浮冗遇亢旱懇禱致應九年考滿民不忍舍丐于富道再任三年而

去黃通志

潘海字百川武緣人正德十四年以監生爲封川知縣時寇亂後撫綏流亡民以安集未幾致仕歸廣西通志

吳蕙江西金谿人由國子生選知封川善體察民隱時剿文德歸仁二鄉獍寇運饑騷然蕙計供繁民困申請協助及江口官鋪貨錢遞年補充嶺表書院蕙謂封之利不利於封人而反利於異境書院並申取回縣以佐夫役民得稍甦健卒亦得宿飽議者謂當軍興之際若非吳公調劑得宜封民不堪命矣封川志

方尙祖字宗道閩之莆田人也幼而岐嶷讀書過目輒不忘博聞強記父兄深器重之方氏莆陽巨族自宋閣學士信儒公明司寇簡肅公以文章忠孝起家而代多理學名儒尙祖

弱冠領鄉薦萬厯四十五年受封川令封當兩粵咽喉地瘠民勞下車數月庶務畢舉加意休恤催科撫字兩得其平攝德慶州符一以治邑之政治之吏畏民懷爲當時循良最臨封俗尙簡樸自漢唐以來雖代多賢人君子而邑乘一事闕焉不載尙祖官斯土卽慨然爲已任流覽風俗形勝考古鏡今網羅散失集思廣益成縣志一書存百世文獻尤工文藝詞賦臨封古蹟名勝無不遊覽題詠著有思思堂詩集高明區大倫爲之敘尙祖蒞封七載正己率物有如一日天啟壬戌報最行取旋陞淮安司馬卒

封川續志

周洪德貴州人舉人崇正十三年知封川治行有聲封民德之轉湖廣茶陵郡守封民立祠於縣治之右

縣草志

陳顯長樂人由鄉薦宣德間教諭封川持身克慎造士有方

擢交趾監察御史官至陝西按察使嘉靖四十二年祀名宦

吳志

萬顯藤縣人領鄉薦成化間封川訓導負應變才時有寇都御史韓雍檄領民兵防禦保障有功聲振遠邇薦陞本縣知縣晚節益堅政事修舉深得民心董築城垣盡心區畫至今稱之

同上

郭纓正德六年司訓封川爲人冲雅簡默工詩文尤善草書師模峻整勤課士獎掖不倦晨昏寒煥工夫有常一意翼序不圖脂沐嘗割俸繕緝學宮建尊經閣恢射圃置祭器鑿頻塘以修形勝所廩不貲寧卹邇之冷也遷靖安教諭所行如封川旣去諸士刻石繫思

封川志

陳順縣尉也正統間廣西大藤峽蠻賊作亂經歲荼毒郡邑

村落封川無城隍士民震恐順仍故址砌築城堞樓臺以憑保障後賊果猝至水陸相應攻城順親率鄉兵守禦城賴以

完

同上

陳潛中名元亮以字行仙遊人以孝友聞洪武十三年舉聰明正直授開建知縣任滿赴京百姓哀留不得行至京計歷俸少十五日例該工役尋赦歸洪武末年上饒縣丞莫士忠者開建人也以忠孝清廉薦潛中於朝奉旨起用力辭以疾

黃通志

建文元年上書尋放歸

吳志

蔣景忠臨武人洪武三十年開建典史撫民有方永樂七年當滿去耆老等遮留之大吏達於朝陞本縣知縣先是有張琮者四川人知縣事公謹慈愛九年任滿遷市舶提舉至是

景忠代之

郝通志

朱瓊臨桂人正統間舉人知開建縣有幹濟才天順三年春

流賊攻縣泊瓊身擊無援死之明統志時典史蘇善亦死焉吳志

陳琳歸善人成化元年知開建縣宅心正大處事公平抑強

暴恤貧窮修城池興學校後以憂去黃通志

黃瑜南城人景泰中由舉人知四會縣未幾以憂去天順三

年服除起知開建縣有守有為盡心撫字邑常被寇瑜植木

柵以守復造磚城事辦而不擾禦寇自挾弓矢有流賊經過

督兵敗之成化二年薦陞雷州知府秩滿加叅政俸留任吳志

按兩黃瑜一臨桂人知肇慶府

莊科晉江人舉人正德五年知開建縣勤於政事禮士愛民

崇學校闢田野興利除害民懷其惠未幾移知順德終高州

府知府同上

武職

花茂巢縣人元季起兵從陳世光歸附累以戰功陞神策衛指揮僉事洪武十三年調廣州左衛剿平陽春等縣叛賊以肇慶常爲四會大羅山徭賊所擾請設肇慶衛於城以鎮之陽江濱海又請設海朗雙魚二守禦所以防海寇厯遷廣東都指揮使子孫世襲廣州左衛指揮使廣人祠茂於粵秀山

錄獻徵

王英肇慶衛指揮天順二年封川守備時西賊擾攘居民震驚競入城避城狹不能容英乃廣斥外垣列團柵植刺竹以爲藩蔽濬濠注水環之厥後寇至恃以無恐且御卒有法外侮稍銷又嘗奉檄率部卒補築東塘亦貽一時之利云

封川志

周昌者肇慶衛指揮也慨懽以奇節自許遇事身先天順六

年守備封川盡心保障隊伍特嚴值西寇千餘水陸猝至人皆怯敵昌奮然持短兵趨與接戰殺傷亦相當久之力億無援寇視我軍寡益猖獗昌竟被創死封人至今哀之

同上

程鑒字本虛廣州指揮僉事也少饒膂力具方畧累以軍功遷都指揮僉事充左叅將分守雷廉高肇四郡尋陞副總兵鎮守廣西未之任值文德歸仁獍賊作亂屠戮鄉人男婦甚眾鑒以巡撫張岳檄領部卒以輕騎深入屯聚鑼鼓守禦殺獲頗多賊勢稍戢逮巡撫岳調兵至鑒統督偏裨分道剿滅令嚴約束士卒秋毫無犯士民稱頌

郡通志

陳策封川東廂人材貌壯偉好習擊劍橫槊術以敢鬪善戰自許時獍獠累年跋扈當事者募策署以名色屬之健卒隨領所部眾徒步格八賊圍手刃數百級賊懼不敢當服招撫

者千餘撫按欲敘其功大用之竟阻於誣者至今九山獠獍

猶德其招撫云

封川志

陳相蘄州人中所百戶正德九年自廣西調雷州善跳盪以
勇著聞調守陽春鳳凰寨山賊猖獗乘夜來攻相督兵拒之
兵潰力戰殺數賊遂遇害

海波集

王瑾束鹿人嘉靖初佩征南將軍印鎮兩廣廣東新寧新興
恩平間多高山叢箐亡命者輒入諸徭中吏不得問眾至萬
餘人流劫高要陽江諸縣官軍討之輒失利三十五年春瑾
與巡撫都御史談愷檄諸路土兵誅其魁陳以明悉平諸巢
捷聞加太子太保而扶藜葵梅諸山崗馮天恩等據險爲寇
者亦數十年瑾復督軍分道進剿破巢二百餘

明史王驥傳

楊瑄福建金門所人由雷廉叅將於萬曆五年大征西山賊

屢立奇功嚴號令信賞罰愛民禮士甚得眾心凱還時紳士
爲詩以餞陽春志

胡兆隆萬厯六年由本所總旗以大征西山有功封副千戶
卽調黃岡所十年五月卒羅定道及守備爲之殮殯得士卒
心哭聲震野同上

鄒維勳清流人崇正間任肇慶府守備時流寇攻圍韶州奉
檄統兵赴援斬首六百餘級賊敗走次日復進兵追賊伏發
力戰陷陣而死福建通志